

Demopterus *IV*

Abt. *II*


Nili (L.) Cratia

Nili

BIBLIOTECA
CENTRALE
FIRENZE
INDICAZIONE



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald. 1.5.42





Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.42



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.42



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.42

B. 36. rana 2.


Ho. 1/5.


Vedi le altre due



Ex Libris Joannis Nencini

1874





34
No. 51
DEMOSTHENIS
ORATIONES QVATVOR

CONTRA PHILIPPVM,

A' Paulo Manutio latinitate donatæ.



Venetiis, M D L I.

APVD ALDI FILIOS.

DEMOSTHENIS

ORATIONES QVAE TVOR

CONTRA PHILIPPVM

A Paulo Manutio Iacintato donata.



Veneritis, M D L I.

APVD ALDI FILIOS.

IOANNI MORVILLERIO,

Christianissimi Gallorum Regis consilia-
rio, & apud Venetam rempu. oratori,

Paulus Manutins Aldi filius S.P.D.

V A' M difficili in loco uerse-
tur eorum industria, qui de græ-
co uertunt, neque tu, ut arbitror,
ignoras, Ioannes Moruilleri uir
clarissime, cui uel exercitatio li-
terarum, uel ipsa natura, uel potius utraq; simul
hoc dedit, ut in iudicando excelleres; et ego expe-
riens ita sensi, ut, qui aliis antea in hoc genere
peccantibus acerbior fuisset, ac durior, idem
postea, re tentata, eo libentius ignouerim, quo
magis eandem ipse culpam extimescerem. Oc-
currunt iis, qui de græcis latina faciunt, duo in-
ter se maxime contraria uitia: quorum utrunq;
cum euitandum æque sit, ita periculosa tamen
cautio est, ut ferè, declinare ab altero dum uis,
in alterum incurras. nam & qui in eo laborant,
ut græca uerba totidè penè latinis reddant, quòd
fideles interpretes haberi uolunt, inepte faciunt,
atque in illa ipsa nimis attenuata diligentia

A ii

grauitatem omnes laudent, nec tamen humani-
tatem quisquam desideret: magni refert ad in-
genii mei commendationem, quid tu, uir prima-
rius, & omni laude circumfluens, de hac mea te-
nui uigilia sentias. potest obscuram per se lucu-
brationem tuum testimonium illustrare: quod
ego si assequar, ad illa praestantiora, quae maio-
rum uigiliarum sunt, quae scis à me iam esse in-
stituta, fiam alacrior: quae ipsa posterum cum le-
gent; non enim dicam, si legent; quia, quod
summe cupio, summe etiam sperare iucundum
est; de tua, non una, aut altera uirtute, sed sapien-
tia, quae omnes uirtutes continet, me narrate co-
gnoscent; et, cum cognouerint, ipsi quoque prae-
dicabunt. Vale. Venetiis, M D L I.

DEMOSTHENIS CONTRA

Philippum oratio prima.

OV A res aliqua si esset agenda,
ego me Athenienses, quoad ple-
Nriq; eorum, qui consuevere, suam
sententiam ostenderent, cōtinuis-
sem; ut, si quid ipsi ad ea, quæ in
deliberationem uocantur, probabilius artulif-
sent, ab hoc dicendi labore supersederem; sin-
minus, tum ipse ea, quæ sentio, conarer expo-
nere. cum uero eadem considerata nunc sint,
de quibus hi sæpe orationem ante habuerunt:
puto me, quia primus surrexerim, ueniam esse
iure optimo impetraturum. ipsi enim si antea
sapienter consulissent, iisdem de rebus consi-
lium uos quidem hoc tempore non quæreretis.
Primum igitur auctor Athenienses uobis sum,
ex hoc rerum statu ne quem omnino mœrorem
fiscipiatis, ne si illæ quidem conditione multo
deteriore uideantur esse. quod enim superiori-
bus temporibus maxime contra uos fuit, id ip-
sum in posterum maxime à uobis futurum ui-
detur. ecquid igitur hoc est? quòd, dum ea,
quæ tempus postulat, omnia negligitis, uestra

O R A T I O I.

culpa Athenienses in has difficultates incidistis. nam si uestro officio nulla re defuissetis, nec tamen idem exitus consecutus non esset, ne spes quidem melioris fortunæ superesset. deinde illud uelim consideretis, & uos qui ab aliis audiuitis, & qui tum ipsi affuistis; uelim inquam consideretis, atque in memoriam redigatis; non longe ab hoc tempore, cum Lacedæmoniorum opes maximæ essent, uestra quæ fuerint decora militaria; cum nihil patriæ laudibus indignum committentes, bellum contra illos fortiter pro libertate sustinuitis. quò igitur hæc spectat oratio? nimirum huc, ut intelligatis, ac planè uideatis, secundam fortunam in uigilantia uobis esse positam, aduersam in socordia. testes Lacedæmoniorum opes, quæ superioribus annis à uobis fractæ cedebant, quia suam quisque operam diligenter, ac strenue reipublicæ nauabat: testes iniuriæ Philippi, quæ nunc animos nostros timore perturbant, quia, quæ curanda nobis essent, omnia negligimus. quòd si quis uestrum hoc existimat, Philippum bello superare difficillimum esse; cum & ea, quæ ille bello parata nunc possidet, consideret; & ad ea, quæ nos amissimus, quæ multa sunt, animum conuertat:

CONTRA PHILIPPVM.

recte sanè existimat, sed idè hoc consideret, habuisse uos Pydnā, habuisse Potidæā, Methonē, finitimam omnem regionē: fuisse, quæ cum illo nationes hodie sunt, plerasque sui iuris, ac liberas. itaq; esse animatas, ut illius amicitia uestra anteponāt. tum igitur si hoc idem & Philippus sensisset, difficile bellum cum Atheniensibus esse, quibus ea loca ad illius uexandam regionem maximum adiumentum afferrent, cum ipse ab omni sociorum præsidio nudus esset: neque ex iis rebus, quas modo gessit, perfecisset ullam, neq; tantam sibi potentiam comparasset. sed nimirum hoc ille præclare uidit, belli præmia hæc esse omnia, in medio constituta: natura uero ita comparatum, ut absentes facultatibus exuantur à præsentibus, à strenuis ignaui. quod cum ita statuisset, occupauit quæcunque uoluit, & tenet, alia quidem bello subacta, alia uero (quandoquidem ad eos sese homines studio se applicant, atq; adiungunt, quos ad ea, quæ curanda sunt, & consilio uident, & animo paratos) in societatem, amicitiamq; traducta. hunc igitur ita sentientem imitari si uolueritis, uosq; o Athenienses, quales antea non fuistis, aliquando præstare; idest, ut, quibus rebus opem reipublicæ

B

ferre oportet, in iis rebus pro uirili parte unusquisque uestrum sine ulla dissimulatione, ac mora se exerceat; qui locupletes sunt, pecunias conferant; qui ætate uigent, arma capiant. denique, ut summatim complectar, si rerum ueststrarum ipsimet curam suscipere uolueritis; ne id, quod antea, committatur, cum in suo quisque munere tardus, atque indiligēs, de eo, quod ad ipsum attinebat, spem omnem in uicino reponeret: prædico uobis; non solū ea, quæ nunc habetis, diis approbantibus conseruabitis; uerum etiam ea, quæ uobis otiosis, ac languentibus adempta sunt, ita recuperabitis, ut ille, qui ademit, debitas pœnas, ac suo dignas scelere persoluat. neque enim Philippum diis immortalibus similem putetis; quorum fortunæ ita fixæ sunt, ut eas conuellere nulla res possit. sunt, qui illum odere, qui timent, qui inuident, & ex iis maxime, qui diligere illum præcipue uidentur: quæq; cæteris hominibus contingunt, eadem & iis, qui cum illo sunt, inesse omnia credibile est. at hæc latuerunt omnia, nec sese hactenus contra Philippum patefecerunt. uitium id quidem uestræ tarditatis, ac negligentiae fuit: quam abii cere aliquando oportet, uidetis enim, quo in sta

CONTRA PHILIPPVM.

tu res sit, cum iste eò peruenerit licentiæ, ut ne
que agendi uobis, neq; quiescendi potestatem
det, sed minetur, & sermones, ut audimus, su-
perbiæ contumeliæq; plenos habeat; tantumq;
absit, ut iis locis, quæ occupauit, libidinem suâ
satiauerit, ut etiam semper aliquid appetat, at-
que ambiat; uosq; futura spectantes, atque otio-
se sedentes suis præsidiiis undiq; concludat. quâ-
do igitur, quando ea, quæ ad uestram salutem
pertinent, agetis Athenienses? cum necessitas
coget? per deos immortales, quæ nã necessitas?
quid autem opus est necessitatē expectare? ego
enim ita censeo, maximam necessitatem liberis
hominibus esse infamiam ac dedecus, obsecro
uos, uultis ne per forum oberrantes uos ipsos in-
terrogare, num quid est rerum nouarum? potest
enim fieri quidquam magis nouum, quam ut
Macedo Athenienses bello premat, Græciæq; im-
peret? obiit ne Philippus? minime id quidem,
sed ægrotus languet. quid ad uos? etenim, si
quid illi humanitus acciderit, uos tamen, cum
ita estis in re uestra negligentes, uos inquam ip-
si o Athenienses alterum Philippum illico
creabitis. neque enim hic sua uirtute potius,
quàm uestra ignauia, tantus factus est. proin-

B ii

de, si quid tale contingat; & fortuna, quæ nobis melius, quàm ipsi nos, semper consuluit, utamur secundissima: (cur enim contingere non possit?) sine dubio, in eiusmodi rerum omnium perturbatione si occasionem urgeretis, res è sententia succederet. quales autem nunc estis, ne si recuperandæ quidem Amphipolis facultas uobis detur maxima, præstare id possitis, quandoquidem suspensi, atque incerti neque agitis quidquam, neque, quid agendum sit, deliberatis. Vestra igitur quænam esse debeat in tuenda libertate tum concordia, tum etiam alacritas si modo uobis officio uestro satisfacere propositum est, quia non dubito quin ipsi intelligatis, ac persuasi iam sitis, id omittam: qui uero apparatus esse debeat, quem ad animos uestros cura liberandos idoneum esse putem; qui militum numerus, quæ pecuniæ ratio, alia præterea ut & optime & celerrime iudicem posse comparari; hoc uero conabor ostendere: si prius hoc à uobis Athenienses petiero, ne quid iudicetis, neue quid prius opinione præripiatis, quàm ea, quæ dicturus sum, omnia audieritis. quòd si cuiquam de nouo apparatu ab initio uerba uidear facere, is me moram rebus iniicere ne

CONTRA PHILIPPVM.

censeat. non enim qui celeriter, ac primo quoque die agendum esse dicunt, ii maxime, quod est republica sit, dicunt, cum ea, quæ facta iam sunt, auxilio quamuis subito prohibere nequeamus: sed is, qui ostenderit, & qui apparatus, & quantus, & unde sustinere bellum eò usque possit, quoad uel cōditionibus re composita utrinque arma deponantur, uel hostibus deuctis uictoriam reportemus. huius enim consilio nostris rationibus in posterum optime cauebitur. Hæc igitur ego ut ostendam, operam dabo, minime impediens si quid aliquis præter ea desert. nec ignoro magnum esse, quod polliceor: sed argumentum res iam dabit: uos iudicabitis. Primum igitur hoc sentio, ac statuo, triremes esse comparandas quinquaginta: deinde, ita uos animatos esse debere, ut in has ipsi, si res exigat, ascendentes nauigetis: tum, ut ad equitatus dimidiam partem traiciendam triremes alias & nauigiorum idoneum numerum adornetis. atq; has quidem copias ad tumultuarium ex illius regione exercitum, siue ad Pyllas, siue ad Cherrhonestum, siue Olynthum, seu quò uos Philippus urserit, opponendas censeo. omnino enim danda opera est, ut hoc ille

CONTRACTIO

ille sentiat, statuisse uos nimiam istam negligentiā abiicere, & pulcherrimum illud exemplū renouare, quod ad Eubceam, quod etiā superioribus temporibus, ut aiunt, ad Haliartum, quod deniq; pauloante ad Pylas edidistis. quod autem fieri dico oportere, etiā si uos id facere nolitis, meum tamen consilium plane contemnendum non est: fiet enim, ut Philippus, uel ob metum, cum uos ita paratos instructosq; sciet (certo autem exploretq; sciet: sunt enim, sunt inquam ex uobis ipsis, qui omnia illi significant, plures quā par sit) armis abstineat: uel si hæc neglexerit, incautus opprimatur cum nemo sit, qui uobis impedimento esse possit, quominus ad illius regionem, si occasio data fuerit, nauigeris. Hæc sunt, quæ probari à cunctis, quæ parari dico, ac iudico oportere. etiā illud addo, ualde mihi uideri è republica fore, si quæ copiae in procinctu, quasiq; in manibus uobis sint, quæ continenter bellum gerant, & Philippum damnis afficiant: at quæ copiae? non externorum militum decem aut uiginti millia, neque cuiusmodi sunt hæc, quæ per epistolas conscribi solent: sed ex ipsa ciuitate, ex uobis inquam ipsis deligi has copias ue-

CONTRA PHILIPPVM.

lim, siue enim unum ducem, siue plures, siue hunc, siue illum, seu quemcunque creaueritis, huius dicto audientes erunt, hunc sequentur, Alimenta præterea unde habeant, curadum uobis est. Ipse uero exercitus quis erit & quātus? & unde comineatum habebit? & ad hæc agenda quam nam inibitis rationem? cognoscite à me: ego enim hæc separatim singula percurram. Externum militem conducendum esse dico, neque committendum id, quod sæpe rebus uestris damna importauit, hoc inquā, quod omnia minoris, quā oportet, æstimantes, & in decretis maxima statuentes, mox in agendo ne minima quidem præstatis, at uos minima potius facientes, & comparantes, his addite, si minora uideantur. Dico igitur militum omnino duo millia esse oportere, in his Athenienses quingentos, eius ætatis, quā uos maxime probabitis, qui certum ad tempus, non hoc diuturnum, sed quā diu è republica uisum fuerit, stipendia faciant, aliis deinde in eorum locum succedentibus, reliquos uero externos esse uolo, & cum his equites ducentos in quibus Athenienses haud pauciores quinquaginta, eadem, qua pedites, conditione militan-

ORATIO I.

tes: quibus conuehendis idoneus nauium numerus adsit. sic igitur fiat. num quid præterea? celeres triremes decem. cum enim classem Philippus habeat, nobis item celeres triremes, quo sit nostris copiis tuta nauigatio, necessario sunt. unde autem his commeatus parabitur? & hoc ego dicam, atque ostendam, posteaquam, cur & hunc tantulum exercitum putem sufficere, & ciues nostros militare uelim, docuero. Numerus hic mihi propter hanc causam o Athenienses placet, quod hoc tempore cum exercitum nobis comparare eiusmodi non liceat, qui contra Philippi exercitum in acie constituatur; sed prædari necesse sit, itaque belli principia administrare: sequitur, ut is neque immensus (deest enim & stipendium, & uero etiam alimentum) neque tamen plane contemnendus esse debeat. ciues autem ut adsint, simulque nauigent, propterea mihi placet, quod antea quoque, cum res publica externorum militum exercitum, cui Polystratus, & Iphicrates, & Chabrias, aliique nonnulli præerant, in Corintho aleret, uos item ipsos simul cum his audio militasse. idemque & hoc audiui, ac didici, cum exercitus uester tum ex peregrinis militibus, tum ex ciuibus constaret,

CONTRA PHILIPPVM.

ret, Lacedæmonios acie fudisse. ex quo autem soli peregrini uestro in exercitu sunt; hi quidem amicos, & socios uincunt, hostes autem supra modum uiribus aucti sunt. bellum reipublicæ ubi quasi per transfennam huiusmodi copiae semel aspexerunt, ad Artabazum, seu quo magis libuit, enauigantes abeunt: dux autem simul proficiscitur, necessitate uidelicet coactus: impere enim non potest, qui stipendium non numerat. quod est igitur meum consilium? ut pecunias in stipendium comparetis, ne qua uel duci uel militibus excusatio relinquatur: tum ut milites urbanos, quasi censores, & spectatores peregrinorum apponatis. enim uero, quo modo nunc quidem rempublicam gerimus, admodum ridiculi sumus. si quis enim ita uos interroget, num quid pacatæ sunt res uestre Athenienses? minime Hercule, dicatis: sed cum Philippo bellum gerimus. Non ex uobis ipsis decem centuriones, & duces, & tribunos, & equitum magistros duos creauistis? quam igitur operam hi reipublicæ præstant? unus in officio est, quem ad bellum emisistis: reliqui simul cum sacerdotibus sacra celebrantibus pompas uobis ducunt, ita quemadmodum figuli lutea uasa, quæ

C

IN V O R A T I O I.

in foro exposita uisuntur, sic uos & centuriones, & tribunos ob eam causam creatis, ut in foro spectentur, non ut armis rempublicam foris tueantur. neque enim uestros centuriones, uestros equitum ductores, quasi praesides urbis domi sedere oportebat, ut urbanus exercitus reuera esse posset; sed in Lemnum equitum ductorem nauigare, Menelaum autem ad libertatem, qua de agitur, defendendam ducem se praebere. neque uero haec ad hominis ignominiam à me dicuntur: sed quemcunque creassetis, talem esse oportebat, quicumque is esset. Atque haec, quae dico, recte quidem à me dici fortasse existimatis: de pecunia uero, quanta futura sit, aut unde comparabitur, cupitis cognoscere. ne hoc quidem praetermittam. Talenta igitur nonaginta, aut paulo amplius, alimenti causa, pro his tantummodo copiis curentur: hoc est, decem uelocibus nauibus talenta quadraginta, in singulas uidelicet singulis mensibus uicena minae: duobus millibus peditum totidem talenta; ut drachmas quisque denas annonae causa singulis mensibus capiat: equitibus ducentis, si tricena singulis drachmae in mense numerandae sint, duodecim talenta, quod si

CONTRA PHILIPPVM.

quis est, qui alendis militibus exiguam hanc esse copiam putet; opinione fallitur. mihi enim dubium non est, quin, si hoc fiat, reliqua sit ipse sibi miles ex bellica præda paraturus, nemine Græcorum, aut sociorum stipendii causa læso. & cum his ipse ego mea sponte sum nauigaturus, paratus ad quæque perferenda, nisi hæc ita se habeant. unde igitur pecunia, quam à uobis in stipendium erogandam esse decerno, conficietur? hoc iam dicam, quæ igitur nos, quidem ò Athenienses excogitare potuimus, hæc sunt. uos autem in ferendis sententiis, quæ maxime probabuntur, ea statuitote, ut ne decretis tantum, & epistolis, sed rebus etiam ipsis cum Philippo bellum geratis. Ac mihi quidem, & de bello, & de toto apparatu consideranti, maxime futurum è republica uidetur, si, qua in regione belli sedem constituetis, eius regionis naturam cogitatione prius, ac mente examinabitis: simulq; illam uobis rationem proponetis, Philippum uentis, & certis anni temporibus utentem loca multa occupasse, suamq; in ditionem ac potestatem rede gisse: cum, Etesiis obseruatis, aut per hyemem occasione capta, quo tempore accurrere nobis ad nostra tuenda ma-

ture non licet. ipse impetum facit. Vobis igitur hæc sunt consideranda; omnisq; belli gerendi spes non in auxiliis sociorum, nihil enim oportune satis ageremus, sed in continuo apparatu continuisq; copiis reponenda. erunt autem percommoda uestris militibus hiberna in Lemno, Thaso, Sciatho, aliisq; proximis insulis, in quibus & portus, & frumentum, quæq; exercitibus necessaria sunt, abunde omnia suppetunt. de anni uero tempore, cum scilicet ad terram liceat accedere; aut quibus uentis ipsam regionem, & emporiorum ostia petere sit tutum, non difficilis erit animaduersio. pertinent hæc ad eum, quem uos exercitui præfeceritis: qui & de re, & de tempore cōsiliū ex occasione capiet. ego, quæ uos agere oporteat, exposui. Pecunias primum, quas dixi, deinde & alia omnia si mature curabitis; & milites, triremes, equites, copias plane uniuersas lege lata discedere à bello prohibueritis; ipsiq; & custodiendæ dispensandæq; pecuniæ curatores, & de rebus à duce gestis quasitores esse uolueritis: uos quidem diurnæ sollicitudinis finem reperietis, qui uestris de rebus assidue deliberatis, præterea nihil agitis: Philippus uero, quod compendium habe-

CONTRA PHILIPPVM.

bat maximum, eo priuabitur. quodnam autem compendium hoc est? uestrorum uos oppugnat sociorum facultatibus, dum eos mare nauigantes capit, atque abducit. quid præterea? hostibus damna inferetis, ipsi extra damnum in tuto collocati. quod contra ante hoc tempus accidit: nam neque, cum in Lemnum atque Imbrum impetu facto captiuos abduxit ciues uestros; neque, cum ad Gerastrum, magno nauigiorum numero intercepto, uim auri, argentiq; immensam coegit; neque uero, cum in Marathonem descendit, & sacram inde triremem auexit; uos hæc prohibere, aut opem ferre satis tempestiuam potuistis. At quid esse tandem causæ existimatis, cur & Mineræ & Bacchi dies festi, siue nobiles uiri, siue infimi homines id muneris sortiti sint, semper suo tempore celebrentur, & quidem tanta in eam celebritatem erogata pecunia, quanta nullam in classem; tanta operariorum frequentia, tantoq; apparatu, quantus an unquam fuerit, ignoro: contra uestris classibus instruendis ita tempus ducatis, ut elabatur occasio, sicuti ad Methonem, Pagasas, Potidæam? quod illa, quæ ad festos dies pertinent, lege sunt omnia constituta: ne-

que uestrum est quisquam, quin multo ante præ
 uiderit, quis curator, quis in tribu ludorū præ
 fectus; quando eum, & à quo, & quid accipere,
 & quid agere oporteat. nihil in hoc genere non
 certum, nihil non definitum, cautum est dilige
 tissime. at uero in iis rebus, quæ ad bellum bel
 liq; apparatus spectant, nihil non præter ordi
 nem, nihil non confusum, nihil non planè perdi
 tum. itaque, simul ac exauditum aliquid est; &
 nauarchos creamus, & retributiones facimus, &
 de conficienda pecunia deliberamus: tum, ut co
 loni nostri, quiq; separatim habitant, in classem
 ascendant, statuere solemus; & rursus, ut iidem
 mox descendant. hæc dum differuntur, illa sci
 licet, quorum causa classem instituimus, inter
 ea perierunt. quod enim gerendis rebus tribue
 re tempus deberemus, id conterimus in apparã
 do. rerum autem occasiones uestram tarditatē,
 & negligentiam minime expectant. interea tem
 poris quas esse nobis auxilio copias opinamur,
 eas, ubi res ipsa postulat, inutiles prorsus expe
 rimur. iste uero eò deuenit insolentiæ, ut Eu
 bœnsibus huiusmodi iam epistolas mittat.

EPISTOLA.

Quæ audiuitis Athenienses, pleraque sa

CONTRA PHILIPPVM.

nè, contra quàm oportuit, uera sunt, sed auditu fortasse non iucunda. quòd si quis consequi possit, ut ea, quæ ipse oratiõe tacitus præteriit, ne scilicet molestiam pareret, omnino re non essent: nihil obstat, quo minus ad uoluptatem omnes concionentur. sin gratificari concionibus minime conuenit: primum in ipsa re damnum est; deinde, per inanem credulitatem decipi, turpe est. certe enim turpiter errant, qui omnia, quæcunque difficilia sint, usque eò producunt, ut deinde alieno tempore faciant; neque possunt id cognoscere, sapientes duces non subsequi res, sed anteire ipsos rebus oportere. quæ admodum enim exercitibus iure præesse ductorem dixeris, eadem ratione & eos, qui recte intelligunt, præesse rebus æquum est; ut agant scilicet, quæ ipsi probauerint; non ut incertis fortunæ casibus sese committere cogantur. uos uero Athenienses, qui potètia omnibus gentibus antecellitis, classe, peditatu, equitatu, pecuniis: his quidem rebus nunquam non utimini, sed nulla tamen hætenus in tempore usi estis. bellum autem ita geritis cum Philippo, ut barbarorum pugilum certamina referatis: quorum hæc est in pugnis consuetudo: qui plagam acce-

COMPROBATIONE

pit, ad eum locum, ubi laesus est, praesidii causa
 manus admouet. quod si quis ex altera parte
 percusserit, eo quoque manibus accurrit. praemunire uero, aut paria reponere, neque nouit,
 neque uult. uestra ratio non dissimilis est. nam
 si Philippum in Cherrhonessum audistis impetum
 fecisse, illo statuitis auxilium mittere: si in
 Pylas, illo: si quod praeterea, sursum deorsum con-
 cursatis: quasiq; ad illius praescriptum milite-
 tis, ita nihil neque de bello consulitis, pro re ue-
 stra, neque prouidetis ante, quam aut factum
 iam, aut fieri aliquid exaudistis, quam tardita-
 tem antea fortasse temporum conditio patieba-
 tur: nunc eo deuenimus: ut eidem culpae lo-
 cus minime sit, ac mihi deus aliquis uidetur o
 Athenienses, quod ob ea, quae a uobis in repu-
 blica peccantur, erubescat, propterea istam
 Philippo rerum gerendarum cupiditatem inie-
 cisse, nam si opibus bello partis contentus esse
 uellet, nihil praeterea moliretur: nonnullos o-
 pinor esse uobis, quibus ea conditio probare-
 tur, quorum culpa ignominiam communiter
 omnes subiremus, qui & imbelles atque effae-
 minati, & usquequaque turpes haberemur. cum
 uero quotidie aliquid aggrediatur, maioremq;
 poten-

CONTRA PHILIPPVM.

potentiam appetat; profecto uos è somno excitabit, nisi si de uobis ipsis planè desperastis. nō possum autem non maxime mirari, si nemo uestrum neque considerat, neque indignatur, cum uideat bellum initio propter eam causam susceptum esse, ut illatas à Philippo ulcisceremur iniurias; nunc ideo geri, ne quid ipsi ab eodem patiamur. nec uero dubitandum est, quin ille, nisi quis occurrerit, ueteribus iniuriis nouas etiam adstruat, atque accumulet. hanc cinea feremus ignominiam? & inanes triremes si emisseritis, cum ea spe, quam de isto cepistis, præclare omnia successura existimatis? non exhibemus? non ipsi hoc tempore, si minus antea, cū urbanarum copiarum parte egrediemur? non ad illius regionem adnauigabimus? quonam appellemus, dicat aliquis? bellum ipsum Athenienses, quā sit ille infirmus, nobis indicabit, si modo aggredimur. sin autem domi sedemus, oratorum conuitiis mutuisq; accusationibus aures oblectantes, nihil unquam à nobis, quod è republica sit, administrabitur. quò enim pars aliqua ciuitatis cursum direxerit, etiam si non omnis adsit, ibi opinor & deorum benignitas, & ipsa in nostris præsidiis fortu-

D

IN ORATIONE

na pugnabit. quò uero ducem, & inane decretum, & spes de concione miseritis, ibi nihil geritur pro uoluntate: & cum ipsi ab hostibus deridemur, tum socios nostros, ex huiusmodi apparatibus de salute desperantes, metus exanimat. non potest enim, non potest unus homo, quæcunque cupitis, hæc uobis omnia præstare: promittere quidem, & monere, & hunc & illum accusare potest. sed hæc nostras fortunas euerterunt. cum enim externorum militum dux, qui promisso à uobis stipendio miseri fraudabantur, uictus acie sit; apud uos autem facile existant, qui ea, quæ ille in bello egerit, ementiantur; & uos ex aliorum sermonibus decreta quælibet temere faciatis: quid est, quod sperandum uideatur? hæc igitur qua ratione corrigentur? si ad militiam uosmet ipsi prodibitis, ut & commilitonum uestrorum in bello testes, & dum iudices, ubi domum ueneritis, iidem esse possitis. non enim ea, quæ ad uos ipsos attinet, auribus duntaxat accipere, sed oculis præsentibus intueri uos oportet. nunc autem eo turpitudinis reductæ res sunt, ut quilibet uestrorum ducum bisq; terq; apud uos de capite causam dicat, cum ad uersus hostes nemo eorum ne semel

CONTRA PHILIPPVM.

quidem decertare capitis cum periculo audeat, sed plagiariorum, & furum mortem turpissime deligant. malefici enim hominis est, iudicio damnatum necari: ducis autem cum hostibus pugnanti occumbere. at è uobis alii circum euntes Philippum, dicunt de perniciè Thebanorum, & rerum publicarum interitu consilia cum Lacedæmoniis inire: alii, qui legatos ad Regem Persarum misisse: alii, qui urbes in Illyrio munire: denique alii alia, ut cuique libet, fingentes oberramus. ego uero sanè illum existimo rerum gestarum magnitudine ebrium esse, multaq; huiusmodi quasi somniâtem in animo uersare, utpote qui tum aduersariorum infrequentiam animaduertat, tum suis ipse gestis extollatur: minime autem sic agere constituisse, ut apud uos homines stultissimi, quid facturum ille sit, dispicere potuerint. sunt enim stultissimi certe, qui rumores dissipât huiusmodi. quòd si hæc dimittentes illud consideremus, & inimicum esse Philippum, & nostra nobis eripere, & iniurias pridem intulisse, & quæcunque nostra causa facturum unquam sperauimus, ad nos oppugnandos omnia conuertisse, reliqua in nobis ipsis esse; & hoc tempore bellum illic aduersus ipsum

D ii

MOR. I. CON. PHIL. 00

gerere si nolumus, procul dubio futurum, ut hic
gerere cogamur: hæc inquam si consideremus,
id assequemur, ut neque ea, quæ pro republica
sunt, ignoremus, neq; sermonibus inanibus o-
peram demus. non enim, quæcunque futura un-
quam sunt, considerare uos oportet, sed perni-
ciem inde euenturam, nisi caueatis, & opportu-
na remedia adhibeatis, sapienter prænoscere.
Equidem cum antea nunquam loqui ad gratiã
institui, nisi quod & uobis profuturum mihi ip-
se iam persuasissem: tum uero nunc ea, quæ sen-
tio, simpliciter omnia, nihil dissimulans, libere
dixi. quod utinam, quemadmodum optima uo-
bis intelligo audientibus prodesse, sic optima
intelligerem dicenti profutura: dixissem enim
multo libentius. nunc autem, cum obscurum ef-
fet, quisnam ex hoc meo consilio mihi ipsi exi-
tus impenderet: quia tamen è re uestra fore, si
hæc fecissetis in animum induxeram, non puta-
ui mihi esse faciendum, ut tacerem. uincat autẽ
quæcunq; uobis uniuersis utilior est futura sen-
tentia.

DEMOSTHENIS

contra Philippum oratio secunda.

V. Miis de rebus, quæ à Philippo aguntur, & contra pacem quotidie committuntur, orationes habeantur: sanè ego in his orationibus tum iustitiæ, tum humanitatis quãdam speciem agnosco; & omnes, qui Philippum accusant, intelligo ea dicere, quæ pro republica uideantur: quæ uerò necessariae res sunt, earum rerum, ut breui complectar, non modo fieri nullam uideo, sed nec eiusmodi quidquã, ut in audiendis oratoribus bene posita opera uideri possit: eoq; rationes ciuitatis iam deductæ sunt omnes, ut, quo quis acrius, atque apertius Philippum ostendat & pacem nobiscum sanctam uiolare, & Græcis omnibus insidias tendere; eo minus, quid agendum sit, deliberare possimus. cuius difficultatis causam huc refero, quòd omnes, qui aliena immoderate appetunt, rebus & factis coerceri, non uerbis oportet. primum quidem nos, qui de suggestu dicere solemus, his de rebus metu uestre inimicitie neque decretum

O R A T I O I I .

ullum proferre, neque uerba facere ausi sumus.
 quæ uero à Philippo aguntur, ut grauiæ, & acer-
 ba, & omnino ciuitati exitiosa, commemora-
 mus: deinde uos, qui hoc in loco deliberaturi
 confidētis, sanè uel ad sententiam egregie dicē-
 dam, uel ad ueritatem ex alterius oratione co-
 gnoscendam, paratiores estis, quàm Philippus:
 ad ea uero, quæ nunc ille conatur, impedienda,
 imparatissimi estis. contingit autem, quod, ut
 opinor, & necessarium, & consentaneum certe
 fuit, ut quas res utrique tractatis, & in quibus
 uestra se exercet industria, in his rebus utrique
 excellatis, ille quidem in agendo, uos autem in
 dicendo. quòd si nunc item in uerbis, modo pro-
 babilia sint, tantum ponitis, ut ea per se suffice-
 re putetis: neque difficilis, neque laboriosa res
 est. sin autem id quærimus, quo modo præsen-
 tem reipublicæ statum corrigere possimus; nèue
 Philippus, nos omnes fallens, in augendis impe-
 rii sui uiribus usque eò progrediatur, ut opes
 deinde nobis tantas opponat, quantas ferre ne-
 queamus: non eadem, quæ antea, consulendi ra-
 tio probanda uobis est; sed ita omnes planè, &
 qui de reipublica uerba facitis, & qui auditis, sen-
 tire debetis, ut iucundissimis & suauissimis uer-

CONTRA PHILIPPVM.

bis res optimas, & salutare anteponatis. Primum igitur, si quis ò Athenienses animo confidit, cum, Philippi potentia quàm longe lateq; pateat, intueatur; neque ullum ab eo reipublicæ periculum imminere, neque contra nos hæc parari omnia iudicat; uehementer miror: uosq; omnes simul rogatos uelim, ut aures mihi uestræ tantisper pateant, dū eas rationes breui narratione percurro, quæ me, ut & contraria timerem, & hostem statuerem esse Philippum, impulerunt: ut, si rectius ego, quàm alii, de futuris rebus uidear consulere; sententiam meam probetis: sin eorum, qui nihil timendum esse ipsi si bi persuaferunt, probabilior oratio uidebitur; hos sequamini. Ego igitur ò Athenienses ita ratiocinor; primum, quæ Philippus pacis tempore suam in potestatem redegerit, Pylas, aliq; in agro Phocensi. quid igitur? quo modo hac potentia accessione usus est? quæ Thebanis cōducunt, non quæ nobis, agere constituit. quam ob rem? quia, ut arbitror, cum plus semper appetat, suasq; cogitationes non ad pacem, non ad otium, non ad ullam iustitiæ partem, sed ad unā ipsius potentiā referat, probe scit, nullam se nostræ ciuitati nostrisq; moribus spem tantā ostē-

raturum, aut quidpiam eiusmodi facturum, quo
 uos adducere possit, ut illi, uestræ utilitatis er-
 go, aliorum Græcorum quenquam prodatis:
 contraq; eos esse non ignorat, qui ab æquo, &
 bono minime discedatis; qui, sicubi dedecus
 atque ignominiam uideritis, quasi à pestifero an-
 guæ refugiat; qui denique, quæ prouidenda
 sunt, omnia prouideatis; neque secus illi, si
 quid agere cōtra fas, & æquum aggrediatur, ob-
 uitam ituri sitis, ac si bellum cum ipso gereretis.
 de Thebanis autem, id quod contigit, fore su-
 spicatus est, ut beneficiis deuincti, quasi referen-
 dæ gratiæ loco sinerent illum arbitrati suo reli-
 qua peragere; neque solum non repugnarent,
 aut impedirent, sed etiam, si iuberentur, iunctis
 armis unà cum ipso militarent. neque nunc a-
 liud spectat, cum in Messenios, & Argiuos be-
 neficia confert. quæ uestra est eximia sanè laus
 o Athenienses. his enim factis Philippus, quid
 de uobis sentiat, indicauit: sentit enim certe, so-
 los ex omnibus esse, quibus neque lucrum ul-
 lum, neque gratia, neque ulla omnino utilitas
 id persuadere possit, ut uel communem Græ-
 corum libertatem esse prodendam, uel uestram
 erga eos beneuolentiam immutandā iudicetis.

iure

CONTRA PHILIPPVM.

iure igitur & de uobis ita sensit, & de Argiuis,
ac Thebanis aliter; qui nō hāc modo tempora
præsens inspiceret, sed superiora etiam mente,
& cogitatione repeteret. comperit enim, ut o-
pinor, atque audit, maiores uestros, cum im-
perium uniuersæ Græcie consequi possent, mo-
do Persarum Regi parere ipsi non recusarent;
non solum hunc sermonem nō tulisse, cum A-
lexander horum proauus legatus his de rebus
uenit, sed urbem potius deserere, & durissima
quæque pati uoluisse; eaq; demum facinora e-
didisse, quæ cōmemorare omnes quidem sem-
per uoluere, pro dignitate autem nemo potuit:
quare & ipse prætermittam: maiora enim illorū
sunt facta, quā ut ea complecti oratione quis
possit. contra uero, Thebanorum, atque Argi-
uorum proauos cōperit aut barbaro socios, aut
non aduersarios in bello extitisse. utrisque igi-
tur propriam utilitatem ita dulcem scit futurā,
ut de cōmuni Græciæ cōmodo minimum labo-
rent. statuebat igitur, si uos amicos delegisset, tā-
tis per uos esse amicitia conseruatuos, quatenus
ille iustitiam coleret: sin autem illos sibi adiun-
xisset, suæ cupiditatis, atque auaritiæ socios ad-
iutoresq; futuros. his de causis & nunc amici-

E

tia uestræ societatem illorum anteponit : non enim aut uobis illos numero nauium uidet antecellere : aut, cum in continenti eximiam quādam potentiam sibi comparauerit, de mari, atque emporiis minime laborat : aut denique sermones illos, & promissa, quibus pacem adeptus est, ex memoria deleuit. uerum enim uero (si diis placet) dixerit aliquis, Philippum, hæc uidentem omnia, non auaritiæ causa tunc illa fecisse, neque quod is esset, quem accusatio mea describit, sed quod Thebanorum causam iustiorē quā nostram, existimaret, minime, hac enim potissimum excusatione maxime omnium ipse excluditur. qui enim Lacedæmonios urbe Messene iusserit cedere ; Thebanis Orchomenum, & Coroneam tradiderit ; hæc se ideo fecisse, quia iusta existimaret, quo figmento poterit probare ? At fecit, credo, ut coactus (hoc enim reliquum est) & Thessalorum equitatu, Thebanorum peditatu præter opinionem circumclusus, metu ista concessit. præclare, itaque dicunt, Thebanis illum quidem diffidere, neque sibi amicos iudicare, sed quia tempus ita postulet, dissimulare. rumoresque à nonnullis per urbem disseminantur, Elateam esse muniturum,

CONTRA PHILIPPVM.

hæc uero differt ille quidem, & differet, ut ego iudico: cum Messeniis autem, & cum Argiuis impetum in Lacedæmonios facere non differt, sed & milites peregrinos immittit, & pecunias suggerit, & adest ipse ex nimia potentia formidabilis. hostes igitur Thebanorum Lacedæmonios perdit: Phocenses autem, quos ipse antea perdidit, nunc seruat. quis ista crediderit? certe enim Philippus, ut quidem ego puto, neque si antea ui adductus contra uoluntatem illa fecisset, neque si nunc de Thebanis male cogitaret, illorum inimicis perpetuus esset aduersarius. sed ex iis, quæ nunc agit, illa quoque de industria ipse se egisse non obscure indicat. quæ si quis omnia ratione, ac mēte perlustrauerit, dubitare non poterit, quin omnes ab illo quasi machinæ ad oppugnandam rempublicam comparentur: atque hoc ipsum, quod facit, quodam modo iam facit necessitate coactus. sic enim cōsiderate. imperare uult: uos autem imperare cupienti solos duxit aduersarios. iniuriam infert multis iam ab hinc annis, & huius culpæ ipse sibi conscius est optime. quæ enim uobis erepta loca tenet; his factum est, ut reliqua extra periculum omnia possideret. si enim Amphipo-

lim, & Potidæā amitteret; ne domi quidem tuto putaret esse posse. nouit igitur utrunq; & se uobis insidiari, & uos insidias illius non ignorare. sapere autem uos cum intelligat, odio se uobis esse iure putat. quo stimulo excitatus est, ueritus nequam à uobis, si occasionem nacti essetis, calamitatem ferret, nisi ipse anteuertisset. his de causis euigilauit, in rempublicam impetum fecit, Thebanorum Peloponnesiorumq; nonnullos eadem sentientes, quos & propter auaritiam habendiq; cupiditatem rebus nouis delectari putat, & propter imperitiam futura non prospicere, omni obsequio studioq; colit. ac licet sanè uel mediocriter sapientibus exempla illa perspicue uidere, quæ mihi, & cum ad Messenios & cum ad Argiuos dicerem, contigit exponere. nec, opinor, eadem apud uos commemorasse fuerit inutile. Quam inuitos dicebam, o Messenii, Olynthios putatis audisse, si quis contra Philippum illo tempore uerba faceret, cum Anthemuntem, cuius urbis possessione superiores omnes Macedoniæ reges summe concupierant, ipsis concedebat? aut cum, eiectis Atheniensium colonis, Potidæam dono dabat? aut cum uestras inimicitias ipse quidem su-

CONTRA PHILIPPVM.

sceperat, illis autem fruendam regionem permiserat? an expectasse, eadem ipsos esse passuros; aut, si quis diceret, credidisse? ne putetis. at tamen, dicebam, cum aliena exiguum ad tempus possedissent, propria in multos annos illo eripiente amiserunt, coacti turpiter abire, cum non modo uicti, sed proditi, ac uenditi etiam à suis essent. non enim rebus publicis tutæ sunt nimix cum Tyrannis familiaritates. Quid porro Thessali? an putatis, dicebam, cum ipsorum tyrannos Philippus eiiciebat, & insuper Nicæam ac Magnesium restituebat, futurum timuisse, ut apud ipsos nunc Decemuiratus constitueretur? aut, qui Pylæam elargitus erat, ut his propria ipsorum uestigalia eriperet? nequaquam. at hæc euenerunt, & perspicua sunt omnibus. uos uero, dicebam, dantem, & promittentem spectate Philippum: aspectum autem, & familiaritatem illius, cum iam uos deceperit, atque in fraudem induxerit, si sapitis, auersamini. tuendis, & conseruandis urbibus multa me hercule, neque ea uniusmodi sunt excogitata; ut aggeres, muri, fossæ, & huius generis alia. quæ quidem sunt omnia manufacta, & impendia requirunt maxima. unum autem natu-

M V O R A T I O II.

ra commune quoddam sapientium propugnaculum in se ipsa comparauit; quod omnibus utile illud quidem est, ac salutare, sed rebus publicis contra tyrannos maxime. quidnam igitur hoc est? diffidentia. istam conseruate: istam tenete mordicus: istam si non dimittetis, nihil graue sustinebitis. quid igitur cupitis, dicebā? libertatem? num'ne Philippum ab hac ita uideatis esse alienum, ut nec nomen ipsum ferat? Reges enim, & tyranni, libertatis hostes omnes sunt, legibusq; contrarii, non cauebitis, dicebam, ne, dum uos è bello cupitis eximere, dominum inueniatis? hæc illi cum audissent, ac planè tumultuarentur, aliaq; à legatis multa & me præsentē, & iterum postea cognouissent; nihilo minus, ut res indicat, Philippi amicitiam, promissaq; sequentur. neque uero est, cur absurdum uideatur, si Messenii, & Peloponnesiorū nonnulli, contra quàm optima ratio persuader, aliquid committunt. recte absurdum uidetur o Athenienses, uos si peccaretis, qui & sapitis ipsi, & monentibus nobis aures datis, monentibus inquam, id quod res est, insidiis rem publicam peti, indagine cingi, futurum ut per uestram ignauiam, sensim, &, ut uideo, uobis

CONTRA PHILIPPVM.

imprudentibus eo deueniat, ut miserrima quæ
que sustineat, adeo uobis & præsens uoluptas,
& otium pluris, quàm mox futuri commodi
spes, est. Verum, quæ uobis agenda sint, uos
met ipsi postea, si modo uestri cura uobis erit,
deliberabitis: quæ uero nunc ad responsa lega-
tis danda statuere uos oporteat, hæc ego iam ex-
ponam. sed enim eos, qui promissa illa detule-
runt, quibus adducti pacem fecistis, huc aduo-
care æquum erat. nam neq; ipse unquam, ut le-
gationem obirem, animū inducere potuissem;
neque uos certe, ut arma deponeretis, si Philip-
pum, pacem assecutum, ea, quæ facit, facturum
iudicassetis. sed erant longe ab his aliena, quæ
tum dicebantur. Erat item æquum, & alios ac-
cersere, quos? eos nimirum, qui, cum ego, fa-
cta iam pace, è posteriore legatione, quam iuris-
iurandi recipiendi causa obiueram, reuersus, de-
ceptam rempublicam intelligens, futura prædi-
cebam, deosq; simul hominesq; contestans, Py-
las, & Phocenses prodi uetabam, mirandum es-
se negabant, si difficilis quidam ac morosus ego
homo essem, quando quidem aquam biberem:
Philippus enim, si aduenerit, nihil ex uestra sen-
tentia non administrabit Thespias, & Platæas

IN VORATIO II.

muniet: Thebanorum iniuriis finem imponet:
Cherrhonestum sua unius impensa perfodiet:
Eubœam, Oropum uobis pro Amphipoli resti-
tuet. hæc enim tunc pro concione dicta esse,
non dubito quin memoria teneatis: quanquam
memores iniuriarum esse non admodum sole-
tis. quoq; turpius nihil est, decreuistis, ut poste-
ri quoque hanc ipsam pacem cum bona spe re-
ciperent: ita penitus isti uos promissis induxe-
runt. quorsum autem hæc ego nunc comme-
moro? & istos huc aduocandos esse dico? uere
mehercule uobis, ac libere narrabo, neque à
me quidquam occultabitur. non ob eam cau-
sam aduocari eos oportere dico, ut ego illis, illi
pariter mihi conuiuium faciant, ex quo meis ini-
micis noua capiendæ iterum à Philippo pecu-
niæ præbeatur occasio: neque uero, ut frustra
garriam: sed quia futurum puto, ut ea, quæ Philip-
pus agit, uehementius, quàm nunc, aliquando
uos afficiant, propterea dico. uideo enim, quo
modo res serpat. quod utinam uera ne uaticini-
ner: ac uereor, ne proprius iam hæc adsint. quã-
do igitur uobis ea, quæ contingunt, negligere
amplius non licet; & ad euertendam rem publi-
cam hæc spectare, non iam à me, aut à quoquã
discitis,

CONTRA PHILIPPVM.

discitis, sed omnia ipsimet inspicitis, optimeq;
intelligitis: uehemens, ut opinor, in animis ue-
stris exardescet iracundia: sed uereor, ne, ta-
centibus iis, qui nostra mala peperere, quia sibi
ipsi corruptelarum conscii sunt, ii, qui rempu-
blicam istorum culpa grauius laborantem sana-
re aliqua ex parte conantur, ad extremum ex
hoc facto uestram offensionem pro fructu exci-
piant, uideo enim ita contingere, ut iracundiā
suam non in eos, qui peccarunt, sed in eos ma-
xime, qui sub manu sunt, non nulli effundant.
dum igitur & spirat adhuc, & aliquam formam
res publica retinet, dum orationes nostras uicif-
sim exaudimus: ego, Athenienses, unumquē-
que uestrum, etsi optime nouerit, monitos ta-
men etiam atque etiam à me uolo, quis uobis
persuaserit, ut Phocenses, ac Pylas destitueretis:
quibus ille potitus, uiam sibi in Atticam regio-
nem ac Peloponnesum patefecit, eoq; rem de-
duxit, ut non iam de alieno iure tuendo, nec de
longinqua alia possessione, sed de Attica Athe-
nienses, & de bello circa ipsam urbem geren-
do deliberandum uobis esset. quod quidem bel-
lum, cum affuerit, unicuique dolorem, ac mo-
lestiam dabit: illo autem, illo cōtractum est die.

F

MOR. II. CON. PHIL:

nisi enim uos decepti tunc essetis, negotii respici-
nunc nihil haberet. certe enim neque nauali pu-
gna uictor in Atticam unquam classe uenisset
Philippus, neque pedestribus copiis ultra Pylas
progressus & Phocenses esset: uerum aut absti-
neret ab iniuria, pacemq; seruans quiesceret; aut,
si bellum gereret, eiusmodi fortuna uteretur, qua-
lis illa fuit, cuius causa pacem antea concupiu-
hac ut uos commonefacere, satis commode a
me dicta sunt: ut uero diligentius inquirantur,
omnes dii prohibete. neminem enim uelim, ne
si exitio quidem dignus sit, simul cum omnium
periculo, ac damno poenas luere.

DEMOSTHENIS

Philippica tertia.

VM multæ, ò Athenienses, orationes in omni ferè concilio de iis iniuriis habeantur, quæ non uobis modo, sed reliquis etiam Græcis à Philippo, ex quo pacem fecit, inferuntur; cūq; certum mihi planè sit, dicturos esse omnes, etsi re non idem præstent, oportere tum uerbis, tum uero rebus ipsis prospicere, ut ille absteat ab iniuria, meritasq; pœnas pendat: eò deducta, progressaq; omnia cerno, ut uerear, ne quod dicam, minus pie illud quidem, sed uere tamen dici possit. Ego, si, quod maxime contra rem pub. foret, oratores omnes suadere, uosq; suffragiis uestris comprobare uoluissetis, nihilo deteriore loco, quam nunc est, fuisse Rempu. futuram arbitror: cumq; non una fortasse, aut altera, sed multæ sanè causæ sint, quamobrem in hunc statum, atque in hanc fortunam res nostræ deuenerint: tum uero maximam, si diligenter examinatis, huius incommodi culpam sustinere eos reperietis, quibus ad gratiam cōcionari, quam, quæ optima sunt, dicere, magis placet.

O R A T I O III.

quorum nonnulli cum honorem, ac potentiam, quam sibi eo nomine maximam compararunt, cum silentio tueantur, futura ratione non prouident, sed ne uos quidem prouidere arbitrantur, alii uero eos, qui gerendis in rebus uersantur, accusantes, & calumniis circumuenientes, nihil aliud agunt, quàm ut ciuitas quidem ipsa de se ipsa pœnas capiat, & in hoc se exerceat: Philippo autem, quæcunque uult, & dicere liceat, & facere, uobis hæc est familiaris, atque usitata gubernandæ reipub. ratio. à quo fonte perturbationes, erroresq; nostri deriuantur. Peto autem à uobis Athenienses, ut, si, dum ueritatem aperit, liberior fuerit oratio mea, ne quid propterea uos mihi succenseatis. sic enim considerate. uos libertatem sermonis aliis quidem in rebus ita communem omnibus in ciuitate putatis esse oportere, ut eam & peregrinis hominibus, & seruis etiam ipsis impertiamini: & quidem famulos multos maiore apud uos licentia quidquid uolunt, loquentes, quàm ciues in nō nullis, aliis ciuitatibus, licet inspicere: ex conciliis autem illam omnino eiecistis. ex quo uobis hoc deinde contigit, ut in conciliis habendis omnia ad uoluptatem referatis, uestræq; au-

CONTRA PHILIPPVM.

res iis pateant, qui beneuolentiam uestram blā
ditiis, & assentionibus colligere non sibi tur-
pe ducunt, in rebus autem, ac factis de summa
iam republica periclitemini. si igitur eadem &
nunc sententia, idemq; uobis animus est: quid
dicam, non habeo. sin ea, quæ ciuitati expediūt,
audire sine assentione uolueritis: promptus ad
dicendum, paratusq; sum. nam etsi pessime se
habet, multisq; partibus comminuta respubli-
ca est: tamen eam, si modo in posterum, uti par
est, aduigilare uelitis, sanare, planeq; in inte-
grum restituere uobis licet. dicam, quod incre-
dibile uideri potest, sed id tamen uere dicam:
quod antea rempub. in rebus gestis maxime la-
befactauit, id ipsum in gerendis maxime confir-
mabit. quidnam igitur id est? hoc sanè, quòd,
omnia uobis minima maxima negligentibus,
de suo statu deiecta respublica est. alioqui, si ni-
hil à uobis neglectum, aut prætermisum esset,
neque tamen respublica non cōcidisset; ne spes
quidem melioris fortunæ superesset. nunc au-
tem, uestram quidem ignauiam, ac negligē-
tiam deuicit Philippus; ciuitatem uero minime
deuicit; neque uos ab illo non modo superati,
sed ne commoti quidem estis. quòd si Philip-

ORATIO III.

pum nobiscum bellum gerere, pacemq; uiolare omnes confitemur: quid aliud oratori dicendum, consulendum ue est, quam quo modo illatas iniurias quamtutissime ac facillime referamus? uerum enim uero cum ita absurde quidam animati sint, ut & Philippo ciuitates occupante, & multa, quæ uestra erant, possidente, omnes denique homines contra ius & æquum diuexante, nonnullos tamen ferant qui è nobis esse aliquos, quorum opera bellum suscitetur, in concionibus dictitant: hoc ut attente animaduertatur, atque etiam ut corrigatur necesse est. timendum est enim, si quis, ut aliquando Philippum ulciscamur: dixerit ac suaserit, ne is in concitati belli culpam incurrat. ego autem hoc primum omnium dico, aperteq; pronuncio: nunquid uobis deliberandi facultas est o Athenienses, utrum præstet habere, pacem an bellum? nam si ut hinc ordiar, pacem habere ciuitas potest; & hoc in manu nostra est: pacem ut amplectamur ego quidem auctor sum: quiq; ita sentiat, ab eo ut & uerbis, & re sine ullo furore in hoc elaboret, precibus contendo. sin Philippus manibus arma gestans, magnoq; stipatus exercitu, nobis quidem pacis nomen osten-

CONTRA PHILIPPVM.

rat, re autem uera facit ea, quæ hostes in bello solent: quid aliud, quam iniurias nostras ulcisci, ac uindicare debemus? pacem sanè appellatis, licet, quemadmodum ille. sed si quis istam uere pacem existimat esse, in qua ille, cum cætera iam omnia subegerit, ad nos recta contendet: primum quidem insanit: deinde, pacem illi à uobis esse, non uobis pariter ab illo, statuit. nimirum hoc est, quod effusa omni pecunia Philippus emit; ut ipse quidem uim uobis inferat, à uobis autem contra nulla referatur. quòd si eò usque ita pergemus, quoad ille bellum se contra nos gerere fateatur: omnium erimus stultissimi: neque enim, uel si in Atticam ipsam, ac Piræum ingrediatur, hoc fatebitur: si quidem ex iis, quæ in alios admisit, coniecturam capere oportet. Hic est, qui Olynthiis, cum ab eorum urbe stadiis quadraginta distaret, alterutrum pronunciauit necesse esse, uel eos in Olyntho non habitare, uel se in Macedonia. deinde, si quis eum propterea accusaret, conqueri, & ad causam dicendam legatos mittere non desiit. At qualis in Phocenses fuit? ad quos tanquam ad socios & amicos accessit, & erant, qui ipsum comitabantur euntem, Phocensium legati. & apud nos

ORATIO III.

multi, eam Philippi profectionem non utilem
Thebanis fore, contendebant. eodemq; artifi-
cio usus etiam Phæras antea occupauit; cum in
Thessaliam ut amicus ac socius uenisset. Pro-
xime autem miseris Oritis, milites, dixit, bene-
uolentiæ causa se misisse, qui res eorum inuise-
rent: audire enim ipsos inter se dissidere, & do-
mesticis discordiis laborare: esse autem bono-
rum sociorum, atque amicorum, eiusmodi tem-
poribus non deesse. an existimatis, cum ille eos,
qui nihil ei nocere, fortasse autem, ne quod ipsi
detrimentum acciperent, cauere potuerunt,
per fraudem opprimere, quàm in dicto bello ag-
gredi maluerit; prædicturum uobis bellum es-
se, ac denunciaturum, ante quàm inferat? præ-
sertim dum ad illius fraudes ita conuiuetis, ut
uoluntario decipi uideamini? ne credatis. ete-
nim sit omnium hominum stultissimus, si cum
uos ipsum læsi minime accusetis, sed è uobis ip-
sis quosdam reos faciatis, & condemnatos ueli-
tis, ille uos moneat, ut ciuili contentione seda-
ta, contra ipsum conuertamini: simulq; oratio-
nibus eorum, quos pecunia corrumpit, ultro se
se priuet: quibus quidem orationibus uos re-
morantur, cum dicant, minime illum, contra
uos

CONTRA PHILIPPVM.

uos bellum gerere. prò Iupiter, est ne aliquis
sana mente præditus, qui cum iudicare uelit,
bellum contra se geratur, nec ne, uerba potius,
quàm facta consideret? nemo certe. Philip-
pus igitur in ipso pacis initio, nondum Diopi-
the duce, neque missis in Cherrhonesum iis,
qui nunc præsidio sunt, Serrium, & Doriscum
occupabat; militesq; quos noster dux immise-
rat, è Serrio muro, & sacro monte expellebat.
atqui, cum hæc efficeret, quid agebat? pacem
enim certe iurauerat. neque uero quisquam di-
xerit, quid ista continent? aut quid est, cur his
de rebus respub. laboreat? utrum enim parua ista
sint, aut uobis omnino negligenda, alia oratio
est. æquitatem uero, ac iustitiam siue tu paruis in
rebus, siue in magnis lædas, æque pecces. agedū
nunc, cum in Cherrhonesum, quam et Rex Per-
sarum, & omnes Græci nostram esse statuunt, pe-
regrinos milites immittit, & auxilium se ferre
profitetur, & hæc ipsa significat, quid agit? ne-
gat enim se bellum contra uos gerere. ego au-
tem, tantum abest, ut hæc agentem pacis con-
ditionibus stare censeam, ut qui Megaras ten-
tet, qui in Eubœa tyrannidem constituat, qui
nunc in Traciam proficiscatur, qui in Pelo-

G

ponneso exitiosa machinetur, qui omnia, quæ
cunque agit, cum imperio agat, eum & pacem
dirimere, & bellum iam nunc gerere cōtra uos
dicam. nisi uero eos, qui machinas admouent,
pacem seruare dicetis, usque dum ariete muros
percusserint. uerum non dicetis, qui enim ea fa-
cit, ac struit, quibus ego affligi possim, is mihi
bellum infert, etiam si non dunt plagam infer-
rat, neque iaculum immittat. quibus igitur de
causis pericula uobis creentur, si quid cōtigerit?
his, si Hellespontum ille a uobis abalienet: si Me-
garas, & Eubœam, contra uos bellum gerens, in
suam ditionem redigat: si Peloponnesum in
suas partes traducat. an ego, qui aduersus rem
pub. huiusmodi machinas inducat, atque ador-
net, hunc ego pacem seruare uobis dicam? lon-
ge abest. uerum quo die Philippus Phocenses
perdidit, ex illo die ipsum ego contra uos bel-
lum gerere iudicaui. uos autem, si uestras iniu-
rias nulla præterea interiecta mora uindicetis, sa-
pienter etiam num facturos dico: sin moram ad-
huc interponitis, frustra mox istam facultatem
desideraturos. in quo ego aliorum consilia ita
non probo, ut neque de Cherrhoneso nunc, ne-
que de Byzantio considerandum esse censeam,

CONTRA PHILIPPVM.

uerum faciendum quidem, ut his opitulemur,
ut ab iniuria defendamus, ut ducibus, qui nūc
ibi sunt, necessaria quæque sumministremus; sa-
nè uero, ut de Græcis omnibus, tanquam in ma-
ximo periculo constitutis, deliberetur. quibus
autem rationibus, ut usque adeo nobis timeam
adductus sim, uolo uobis commemorare: ut si
probabilia dico, iisdem, quibus ego, conciliis
adducti, curam aliquam, si de aliis iam non
libet, at saltem de uobis ipsis suscipiatis: si ue-
ro inania uerba effundere, & arroganter ui-
deor efferri? mihi tanquam insanienti neque
nunc, neque in posterum uestras aures accom-
modetis. quod igitur ex paruo, atque humi-
li, (talis enim ab initio fuit) magnus, ac sub-
limis Philippus euasit; quod inter Græcos ip-
sos neque fides est, neque concordia; quod
multo fuit admirabilius, ut tantus ex illo fieret,
quàm ut hoc tempore, cum multa iam occupa-
uerit, reliqua imperio suo, potestatiq; subiiciat;
& quæcunque huiusmodi possem exponere,
prætermittam. sed illud uideo concedere illi
cunctos homines, exemplo uestro inductos,
quod antea semper omnes Græci ne concede-
rent, bella susceperunt. quidnam inquam? ex

G ii

ipsius libidine omnia administrare, atque adeo
 unumquemque bonis exuere, & Græcorum iu-
 ra usurpare, & urbes in seruitutem ui redigere.
 atqui uos imperium Græciæ tres, & septuagin-
 ta annos tenuistis; tenuere undetriginta Lacedæ-
 monii: non nihil etiam Thebani his extremis
 temporibus post Leuctricam pugnam florere:
 attamen neque Thebanis, neque Lacedæmo-
 niis, ne uobis quidem ipsis o Athenienses hoc
 idem à Græcis concessum est, ut ex libidine om-
 nia administraretis. minime id quidem unquā.
 sed uobis, immo uero illis, qui tum erant, A-
 theniensibus, quod erga nonnullos insolentio-
 res uiderentur esse, statuere omnes bellum infe-
 rendum: statuere inquam, non ii modo, qui in-
 iurias acceperant, sed simul etiam ii qui, quod
 in ipsos commissum à nobis quærentur, nihil
 habebāt. rursus autem Lacedæmoniis imperā-
 tibus, & eandem potentiam, quæ penes uos fue-
 rat, adeptis cum ultra quàm iustitia præscribe-
 ret, progredi conarentur, & antiquum statum su-
 pra modum labefactarent, omnes, etiam qui læ-
 si minime fuerant, tamen ad bellum conspira-
 runt. ecquid alios commemorem? nos enim ip-
 si, & Lacedæmonii, cum neque uos ab illis, ne-

CONTRA PHILIPPVM.

que illi à nobis iniuriam ullam accepissent; tamen, ut alienas iniurias ulcisceremur, suscipienda arma putauimus. tametsi quæcunque uel à Lacedæmoniis in illis triginta annis, uel à maioribus nostris in septuaginta commissa sunt; minime cum iis iniuriis, quibus Philippus in tribus & decem non integris annis, ex quo emergere cœpit, Græcos affecit, conferenda uidentur: conferenda autem? immo multis partibus inferiora sunt. idq; breui oratione declarare facile est. Atque ego Olynthum sanè, & Methonem, & Apolloniam, & in Tracia duas supra triginta urbes non commemoro: quas omnes ita crudeliter deleuit, ut earum ne uestigium quidem ullum prætereuntes agnoscant. etiam Phocensem nationem tantam æque crudeliter excisam prætermitto, at uero Thessalos quo modo tractauit? non ne urbes eorum, non ne res publicas euerit, & apud ipsos Tetrachiam constituit; ut non singulæ modo urbes, sed nationes iam seruiant uniuersæ? in Eubœa uero non iam urbes imposita tyrannide premuntur, idq; in insula Thebanis, Atheniensibusq; proxima? non palam in epistolis ita scribit, mihi uero pax cum illis est, qui meum imperium non

recusant? neque uero hæc tantummodo scribit, non etiam re exequitur. nam in Hellespontum abiit: primum in Ambraciam est profectus. E. lidem tenet, urbem amplissimam in Peloponne so. Megarensibus insidias ante fecerat. neque Græcia iam illius auaritiam, neq; barbaries om nis capit. & hæc intuentes, atque audientes om nes Græci, tamen legatos inuicem non mitti mus, neque commouemur; sed ita male affecti, ita fracti animo per urbes sumus, ut in hodie rum diem nihil, quod prodesset reipubli. aut quod omnino oporteret efficere; neque in unū conciliari, neque societatem, & amicitiam au xilii causa coire potuerimus: sed illum maiores uires in dies colligentem non attendimus: & ut mihi quidem uidetur, id temporis, dum alius in terit, quisque in lucro ponit; pro salute uero Græciæ nihil cogitat, nihil agit: quandoquidē, ut impetus febris, alterius ue mali, cum abesse longissime putatur, tum confecto periodo rur sus accedit; ita nemo sanè futura prænoscit. nec uero uos illud præterit, quæcunque Græci à Lacedæmoniis, aut à uobis passi sint, ab iis ta men esse passos, quos ipsa Græcia genuerat. ac simillimum aliquis id putauerit, quod in am-

CONTRA PHILIPPVM.

plis opibus legitimo filio contingit: qui si præter bonum & rectum aliquid committat, hanc ipsam ob causam dignus sanè obiurgatione, ac reprehensione sit; attamen neque pro alieno habendus; neque hereditatis expertem, licet hæc fecerit, æquum est ut eum appellemus. quòd si seruus, aut nothus ea, quæ ad illum lege non veniunt, disperdat, ac dissipet: dii immortales, quāto grauius esse facinus, quantoq; maiore dignū iracundia, homines clamauerint, in Philippo eiusq; rebus gestis eadem ratio est: non solum enim Græcus non est; uerum ne ulla quidem ex parte Græcos attingit: at barbarus, ex qua natione? non ex ea, quam nominare honeste possis; sed profligatus, ac perditus Macedo, è qua gente nec seruum frugi, aut industrium maiores nostri ullum emebant. hic tamen quid in nos extremæ contumeliæ prætermittit? non ne præter urbes solo æquatas, Pythios ludos, commune Græcorum certamen, ipse constituit, qui si adesse non possit, seruos mittit certamini præfuturos? non in eius potestate Pylæ sunt, exq; uiæ, quæ transitus in Græciam est? non hæc loca custodiis, ac peregrinis militibus insedit? non præcipuam diuini oraculi sedem, uobis exclu-

113

INVOCATIO III.

sis, & Thessalis, & Doriensibus, reliquisq; populis ad publicum Græciæ concilium convenire solitis, unus possidet? cuius loci atque honoris copia fieri ne Græcorum quidem cuiquam solet. iam uero Thessalis quibus legibus administrari ciuitates eorum oporteat, præscribit: milites peregrinos mittit, alios qui sinu maris occupato Eretriensem populum eiiciant, alios qui Philistidem Oreo tyrannum imponant. quæ tamen intuentes Græci ferunt, eorum consuetudinem, ut mihi uidetur, imitantes, qui grandinem spectant, & nequam inde calamitatem patiantur, singuli separatim uota faciunt, prohibere uero nemo conatur. sic non modo iniuriarum, quas Græciæ Philippus infert, ultor nemo est, sed nec earum, quas in seipso quisque patitur: hoc enim iam extremum est. non ad urbes Corinthiorum, Ambraciam, ac Leucadem iuit? non Achæis Naupactum eripuit. Aetolisq; traditurum iureiurando confirmauit? nõ Echenum Thebanis extorsit? & hoc tempore contra socios uestros Byzantios non proficiscitur? omitto reliqua. at Cardiam in Cherrhoneso maximam urbem tenet. quæ cum feramus indignissima atque grauissima, procrastinamur tamen

CONTRA PHILIPPVM.

men omnes, ac languescimus, & ad eos, qui pro
pè sunt, spectamus, mutuo diffidentes, cum il
le nobis omnibus aperte adeo iniurias inferat.
qui cum omnes ita petulanter, contumelioseq;
tractet; posteaquàm unumquemque nostrum de
uicerit, qualem futurum existimatis? Nunc
causas consideremus. non enim sine ratione,
iustæue causa tam alacri animo uel tunc ad li
bertatem retinendam omnis Græcia consen
tiebat, uel nunc ad perpetiendam seruitutem.
erat profecto, erat quiddam. o Athenienses eo
tempore, quod minime nunc est, multorum in
mentibus insitum, atque inclusum, quod & Per
sarum diuitias uicit, & Græciæ libertatem con
seruauit, & maritimis, terrestribusq; pugnis in
uictum permansit: quod quia nunc amissum
est, ideo corrupta Græcia languet, ideo sunt om
nia ex omni parte perturbata. quid igitur illud
erat? nihil fanè artificiosum, nihil callidum;
hoc, inquam, quod uniuersi odio prosequen
bantur eos, qui pecunias aut ab imperare cupien
tibus caperent, aut ab iis, quibus Græciam la
befacere, & contaminare in animo esse. & fa
nè difficillimum erat, ut quispiam in largitio
nis crimine deprehenderetur. quod si quis hu

H

MYORATIO III.

inmodi culpæ affinis esset, grauiissima pœna puniebant. non deprecationi, non ueniæ locus ullus relinquebatur. quo fiebat, ut singularum rerum occasionem, quam sæpe & negligentibus contra diligentes, & otiosissimis contra maxime strenuos fortuna defert, tum quidem ab oratoribus, aut à ducibus emere nemo posset. non tum pecunia tanti erat, ut nostram concordiam dissolueret; non ut barbaris, & tyrannis fidem haberemus; non denique ut tale quidquam committeretur. at hæc nunc, tanquam in foro, turpissimo mercatu omnia uenerunt: horumq; in locum inducta sunt ea, quibus orbis reip. conuersus est, & quibus factum est, ut nouo quodam morbo Græcia moriatur. quanam sunt hæc? inuidia, si quis pecuniam accepit: risus, si is, qui accepit, fateatur: uenia, si adductus in iudicium conuincatur: odium, si quis in hunc inuehatur: & reliqua omnia, quæ largitiones consequuntur. Sunt sanè uobis classes, sunt milites perquam multi: est, unde pecunias colligatis: pro apparatu reliquo nihil deest: suppetunt ea, quæ quibus ciuitatibus contingunt, florere eas, & uiribus inter ceteras excellere iudicamus. atque hæc præsidia cum nunc

CONTRA PHILIPPVM.

& multo plura uobis sint, & maiora, quàm maioribus uestris unquam fuerint: ea tamen inutilia, otiosa, inania ab iis, quorum sententiæ uenales sunt, omnia redduntur. Status hic est nūc nostræ reip. quē uos certe ipsi cernitis: neq; me te ste indigetis. superiora tēpora quàm his dissimilia, planeq; contraria fuerint, ego uobis ostendam, non oratione ex me ipso deprompta, sed literis maiorum nostrorum prolatis: quas illi in columna Aenea incidi, inscribiq; atque in arce collocari uoluerunt: non ut ipsi se ad bene agendum excitarent (etenim sine his literis, quid faciendum esset, præclare nouerant) sed ut monumenta uobis, exempla q; relinquerent, quæ intuentes, quales in uindicanda largitione uos deceret esse, disceretis. quid igitur literæ dicūt? Arthmius, inquit, Pythonactis filius Zelites infamis esto, hostisq; populi Atheniensis, ac sociorum, & ipse, & eius omnes posterī. deinde, cur id factum fuerit, subscripta causa est, quod aurum ex Media non Athenas, sed in Peloponnesum intulerat. hæ sunt in arce inscriptæ literæ. At uos per deos immortales considerate, & cum animis uestris inspicite, quid tandem Athenienses ii, qui tum illa agebant, spe-

H ii

M O R A T I O I I I .

ctauerint, quæ dignitas in illis, quæ fuerit au-
 ctoritas. illi Zeliten nescio quem Arthmium,
 Persarum regi seruientem (nam Asiæ oppidum
 est Zelia) quia domino suo morem gerens, in
 Peloponnesum, non Athenas, aurum intule-
 rat, hostem ipsorum, ac sociorum, infamemq;
 simul cum tota stirpe litteris publicis declara-
 rūt neq; uero quispiā id genus pœnæ leuius exi-
 stimarit ob eam rem, quod Zelita non admodū
 laboraret, si sibi communi Atheniensium iure
 in posterum interdiceretur: nam non ita se ha-
 bet. uerum, cum in legibus, quæ de cæde sanc-
 citæ sunt, scriptum sit, quibus de causis is, qui
 cædis reus esset, pœnas ne daret, sed homici-
 dium commississe impune foret; INFAMIS
 legis uerba hæc sunt, O C C I D A T V R: ni-
 mirum hoc significatur, eiusmodi hominem nō
 modo impune, sed etiam cum summa interfe-
 ctoris gloria interfici posse. ergo illi curandam
 sibi Græcorum omnium salutem existimabant:
 nisi enim hoc animo essent, certe, si quos in Pello-
 ponneso pretio quis emeret, aut corrumpere-
 non laborarent. quos uero accepisse munera co-
 gnorant, ita grauius in eos, atque acerbè ani-
 maduertebant, ut etiam publica infamia nota-

CONTRA PHILIPPVM.

tos uellent. nimirum his de causis tum Græci barbaris, non barbari Græcis, formidabiles erant. at uero nunc dissimilis ratio est: nam neque in hacre, neque in aliis tales estis, quales illi fuerunt: at quales estis? scitis ipsi: quid enim ego singulis de rebus uos accusem? nec uero dissimilis, & melior, quam uestra, cæterorum Græcorum conditio est. quare, mihi credite, & multo studio, & optimo consilio res indiget: quo, inquam, consilio? iubetis explicari? nec, ubi explicauero, irascemini? recita ex libello. RECITATIO LIBELLI. Sed stultus quidam, & planè fatuus est eorum sermo, qui consolari nos uolunt, cum ita dicant, nondum sanè talem esse Philippum, quales olim erant Lacedæmonii: qui cum & mari, & continenti toto imperarent, regem autem Persarum focium haberent, neque sustinere eos uis ulla posset; nostræ tamen ciuitatis ea uirtus fuit, ut & illos damnis afficeret, & ipsa perduraret incolumis. atque ego sic existimo, cum ad totius ut uno uerbo complectar, reip. rationem perturbādam non mediocris accessio facta sit, ut superiorum temporum nunc ne speciem quidem ullam, imaginem ue cernamus, nihil tamen perin-

INVOCATIO III.

de uel immutatum, uel adauctum, atque ea, quæ ad rem militarem pertinent. Primum enim, Lacedæmoniis ea tempestate, nec non reliquis omnibus Græcis hoc in consuetudine fuisse audio, ut quatuor, aut quinque mensibus, quoad anni tempus ferret, militarent; cumq; interim hostium regionem assiduâ incursionibus uexasent, militibusq; & urbanis exercitibus deuiassent, rursus domum se se reciperent. Erat illud hominum genus adeo simplex, & apertum, immo uero ita aptum, atque accommodatum ad morem, consuetudinemq; ciuilem, ut à nemi ne res ulla pretio emeretur, sed legitimū quoddam, apertumq; bellum esset. at contra nunc certe uidetis proditorum uitio pleraque periisse, nihil in acie geri, nihil in pugna. Philippum, uero, quocumque libuerit, proficiscentem non armatorum Phalangas ducere secum auditis, sed eum tenuem uelutim, atque externorum sagittariorum manum, & huiusmodi subsequi castra: quibus ille copiis robustus ac ualens, cum in eos, qui ex domesticis discordiis infirmi perturbatiq; sunt, impetum fecit, neq; obuiam protuenda regione quisquam propter mutuam diffidentiam egressus est, ad motis machinis op-

CONTRA PHILIPPVM.

pugnat. taceo, quàm nihil sua referre putet, utrum æstas, hyems uel sit; qui nullam anni partem eximat, in qua otiosus esse uelit. quæ cum omnes uideamus, rationem inire nos oportet, quo modo ne bellum intra fines nostros admittamus: neque committendum, ut stultitiam illam, qua tunc Lacedæmoniorum bello usi sumus, quasi bonum exemplum imitantes, ad exitum præcipitemur: sed potius omni studio, omniq; uigilantia ita agendum, ita comparandum nobis est, ut sese ille intra sui regni terminos cõtineat, neque uero manus cõseri, & uniuersam remp. in discrimen adduci, mihi placet. nam, quemadmodum à natura tributum uobis est, ut in bello multis sanè rebus uestra melior conditio sit, si modo occasionibus, & officio uestro nõ deesse, animum inducatis: (est enim illius regio ita sita, ut uniuersæ ferè diuexandæ, ac diripiendæ facultatem habeatis; sunt præterea huiusmodi sexcenta) sic ille ad prælium exercitator uobis est. neq; illud tantum est animaduertendum, ne illum locorum oportunitate usi, inultum esse patiamur: sed hoc etiã magis, ac magis considerandum est, ut eos, qui causam illius in concione tuentur, odio prosequamini.

audiri

MYORATIO III.

sic enim uelim existimetis, non licere uobis extra urbem hostes superare, nisi prius in ipsa urbe eos, qui hostibus operam nauant, supplicio mulctetis. quam quidem ad rem, ita mihi Iupiter, omnesq; dii salutes sint, & facultas uobis, & uero etiam uoluntas deest. in eam autem deuenistis stultitiam dicam, an deliratioem, aut quo nomine appellem? (sape enim mihi uenit in mentem uel hoc pertimescere, ne quis dæmō res nostras exagitet) ut, uel quia conuitiis, quæ in alios petulantius iactantur, uel facete dictis oblectemini, uel quia planè inuideatis, quacūque de causa mercenarios oratores, quorum nec negare quidem nonnulli audeant se tales esse, dicere iubeatis, & si quibus conuitia faciant, rideatis. nec uero hoc quodam modo graue esset; tamen si graue quidem sit: uerum accedit illud, quod his ipsis potestatem administrandæ reipublice maiorem tribuistis, quàm iis, qui pro uestra salute concionantur. atqui, talibus oratoribus aures præbere uelle, quantarum calamitatum causa sit, inspicite. dicam autem, quæ uobis omnibus nota erunt. Erant in urbe Olyntho, ex iis, qui publicam rem gerebant, nonnulli, qui Philippi partibus fauerent, & illi omnibus

CONTRA PHILIPPVM.

nibus in rebus in seruirent: nonnulli autem, qui æquum, & bonum, maximeq; ciuium libertatem tuerentur. utri autem patriæ perniciem intulerunt? aut utri equitum turmas prodidere, quibus proditis Olynthus interiit? certe ii, qui Philippo studebant, quiq; dum ciuitas illa staret, eos, qui optima consulebant, ita insectabantur, ita calumniis circumueniebant, ut ab his populus Olynthius Apollonidem, uel in exilium pellere persuasus sit. At uero non istos hæc consuetudo solos perdidit, præterea nullos. nã in Eretria, cum Plutarchus simul cum peregrinorum militum præsidio abiisset; & urbem, portusq; ostia populus teneret; nonnulli ad uos, nonnulli ad Philippum inclinabant. hos cum miseri, atque infelices Eretrienſes sæpe, immo uero semper audirent, ad extremum eos, qui uestras partes in concione defendebant, eiicere persuasi sunt. enim uero Philippus, ut amicũ, & socium possis agnoscere, cum ad eos Hipponicum, & mille peregrinorum militum misisset, portus muros demolitus est, ac tyrannos tres imposuit, Hipparchum, Autumedontem, Clitarchum: & præterea, cum iam aspirarent ad libertatem recuperandam, semel, atque ite-

I

INVOCATIO III.

rum expulit, tum quidem externis militibus cū
 Eurylocho, deinde uero cum Parmenione mis-
 sis: quid multa? in Oreo sanè Philistides, &
 Menippus, & Socrates, & Thoas, & Agapæus
 quod omnibus cernere licebat, operam Philip-
 po nauabant. atque hi nunc urbem tenent. Eu-
 phræus uero quidam, qui etiam in turbe no-
 stra olim habitauit, hic cum id ageret, ut li-
 bertatem Oritæ retinerent, nemini se se in ser-
 uitutem traderent, omitto quas iniurias atque
 ignominias pertulerit: multas enim commemo-
 rare liceat: factum illud iniquissimum nō omit-
 to, quòd anno ante urbem captam, cum Philisti-
 dem, & qui cum eo consentiebant, proditiōis
 nomine accusaret, odore quodā ea, quæ illi ma-
 chinabantur, assecutus; cum magna uis homi-
 num conglobata, duce, atque auctore Philippo
 in carcerem contrudunt: tanquam qui res no-
 uas in urbe moliretur. quam indignitatem
 plebs Oritarum cum intueretur, tantum ab-
 fuit, ut hic opem, atque auxilium ferret, il-
 los uero supplicio afficeret, ut illis ne irascere-
 tur quidem, huic uero etiam insultaret, & tum
 hominem ea pœna dignissimum diceret, tum
 factum gratularetur. iidem postea licentiam na-

CONTRA PHILIPPVM.

cti, quantam uellent, id agebant, ut Philippus urbe potiretur; quodq; agebant, ut ad exitum perduceretur, summe curabant. quorum consilia si quis de multitudine sensisset, perculsus metu silebat, cum acerbum Euphræi casum reminisceretur. erant autem ita misere affecti, ut de communi calamitate minime dubia nemo prius uocem mittere sit ausus, quam instructis ordinibus hostes mœnibus appropinquarunt. ita factum est, ut, cum alii sese armis tuerentur, alii per prodicionem Philippum admiserint. capta urbe turpiter sanè, ac misere, proditores regnant, tyrannidemq; exercent, iis unà cum euphræo, qui se ipsos tum seruare cupiebant, nullamq; fortunam pro libertate recusabāt, partim in exilium extrusis, partim morte mulctatis. Euphræus autem ille se met ipse iugulauit, exitu ipso testatus se se, dum uiueret, non priuati cōmodi causa, sed quia iustitiā coleret, Philippo pro salute ciuium restitisse. miramini fortasse, quid tandem causæ fuerit, quam ob rem ita euenerit, ut & Olynthii, & Eretrieneses, & Oritæ libentius iis, qui pro Philippo, quàm iis, qui pro ipsis uerba facerent, aures darent: quod uobis etiam uisum uenit: uidelicet, quia pro bono, & æquo di-

MORATIO III.

centibus, ne, si uelint quidem, loqui ad gratiam
& ad uoluptatem quidquam licet: considerare
enim hi coguntur, qua maxime ratione seruare
patriam possint. illi uero, quibus in sententiis
gratiam aucupantur, in iisdem & pro Philippo
faciunt. hi pecunias conferri iubebant: illi con-
tra. hi bellum geri oportere, Philippo nullam
fidem habendam esse dicebant: illi pacem esse
bello anteponendam. cum in eiusmodi delibe-
rationibus tempus eximerent, ecce tibi repente
obruiti, atque oppressi sunt. & ne singula per-
sequar, eodem modo reliqua omnia; ut non
nulli ea dicerent, unde sibi gratiam quærent;
nonnulli uero ea in medium afferrent, quibus
ciuitatis salus perduraret incolumis. maiorem
autem reip. partem, & quidquid reliquum erat,
perdidere multi, non ob gratiam, non ob im-
peritiam, sed quia demittentes animum fortu-
næ succubuerunt, cum omnino actum esse de
repub. ducerent. quæ desperatio, ita me Iupi-
ter, & Apollo seruet, ne uestros quoque ani-
mos occupet, magnopere timeo, postea quàm
uobis accurate considerantibus, nihil tamē suc-
cedere pro sententia uidetis. atque ego, cum in
eos, qui uos istam in mentē impellunt, intueor,

CONTRA PHILIPPVM.

non timore equidem, sed pudore potius affi-
cior. siue enim id de industria, siue ex impru-
dencia committunt, in magnam certe calamita-
tem rempublicam protrudunt. sed ne accadat,
cauete o Athenienses: milies enim mori præ-
stat, quàm Philippo quid per assentationem
elargiri, eosq; qui pro uestra salute ex hoc lo-
co uerba faciunt, proditos uelle. & uero præcla-
ram sanè Oritarum multitudo mercedem nunc
accepit, quòd se se Philippi amicis commisit,
quòd in Euphræum impetum fecit. præclaram
populus Eretrienfis, quòd uestros legatos exe-
git, & se se Clitarcho tradidit. qui nunc præmii
loco, uerberibus cæsus, & tormentis excruciatu-
s, miserrimam seruitutem. egregie tempera-
tum est Olynthiis, quòd magistrum equitum,
Lasthenem crearunt, Apollonidem autem cie-
cerunt. stulti, ac nequam hominis est, hæc spera-
re; cumq; & ipse tibi male consulas, & quæ tem-
pus postulat, omnia prætermittas, atque etiã ho-
stium causam in concione agentibus aures præ-
beas, ita firmis uiribus putare remp. niti, ut debi-
litari, ac prosterni quamuis graui, quamuis
aduersa fortuna non possit. enimuero turpe il-
lud est ubi quid iam euenit tum dicere quis-

MORATIO III.

nam hæc euentura putasset? pro Iupiter, hoc facere oportebat, hoc non oportebat. multa nunc Olynthii possent dicere, quæ tunc si præuidissent, minime periissent: multa Oritæ: multa Phocenses: multa quicunque libertatem amiserunt: sed frustra dicerent: quid enim hæc prodesse? dum incolumis nauis est, siue ea maior, siue minor sit, tum & nautas, & gubernatorem, & omnes deinceps homines curare in primis, & prouidere oportet, ne quis eam neque sciens, neque imprudens euertat: post naufragium inane studium, inanis labor omnis est. uestra ratio Athenienses eadem est. dum enim incolumes adhuc sumus; dum florentem ciuitatem, occasiones ad bene agendum plurimas, dignitatem summam habemus: cur non rempublicam quasi commune quoddam nauigium communi studio à tempestate tuemur? sunt fortasse nonnulli in hoc confesso, qui iandudum expectant, libenter audituri, quidnam ego faciendum esse censeam. equidem nihil occultabo, ac meam sententiam in medium afferam; ut eam, si placuerit, uestris suffragiis comprobetis, uos, uos, inquam, primum ad uindicandas iniurias classem, pecunias, milites comparate: etenim si cæ-

CONTRA PHILIPPVM.

teri omnes utique seruitutem non recusarent, uobis esset pro libertate uel acerrime pugnandum. deinde, ubi hæc & in procinctu omnia, & Græcis manifesta fuerint, tum alios cohortemur, & legatos, qui hæc edoceant, quoquo uersus dimittamus, in Peloponnesum, Rhodum, Chium, etiam ad Persarum Regem (neque enim ab illius utilitate uidetur alienum, non permittere, ut iste omnia sub imperium ditioneque suam conuertat) ut; si persuaferitis, periculorum, ac sumptuum, quos tempus exiget, socios, participesque habeatis: sin minus, saltem moram, & tarditatem rebus iniiciatis: cum enim non cum potentissima ciuitate, quæ de nostris fortunis coierit, & conspirauerit, sed cum uno uiro bellum uobis sit, prorsus non erit inutile. neque uero illæ circa Peloponnesum legationes omnino sine fructu fuere, quas de Philippi iniuriis ego, & Polytheuctus, ille, ille optimus, & Hegesippus, & Clitomachus, & Lycurgus, aliique complures obuiimus: quod enim ille se continuit, quod in Ambraciam profectus non est, quod in Peloponnesum non irruit, ex iis legationibus perfectum est. neque uero, ut alios ad arma capienda cohortemur, ipsi in re nostra

2111

MYORATIO III.

inertes, ignauiq; simus, ego dico: qui enim sua ipse negligat, eum dicere se se aliena curare; & qui ea, quæ iam ad sunt, cōtemnat, eum alios uelle futura pertimescere, stultitia est. minime, inquam, hæc dico. at uero in Cherrhoneso militatibus oportere pecunias mittere, & alia, quæcunque petunt, suppeditare; nos interim hic apparatibus operam dare; primos agere, quæ sunt agenda; deinde & alios Græcos conuocare, cogere, instruere, monere; hæc sunt quæ ego dico: quæ quidem ad huius urbis amplitudinem, uestramq; dignitatem maxime pertinere uidentur. quod si uobis desidiose languentibus, Chalcidenses, aut Megareses Græciam seruaturos opinamini: næ ista à uero longe aberrat opinio: optabile est enim, ut seruare se ipsum horum unusquisque possit. uestrum est hoc munus Athenienses, uestre sunt partes. uobis hanc laudem uestri maiores, multis, & præclaris, & magnis periculis partam, reliquerunt. sin autem otiosi sedebitis; & unusquisque uestrum id, quod cupit, ita quæret, ut, quo modo ipse nihil agat, consideret: primum quidem, qui pro uobis acturus sit, neminem unquam reperietis: deinde timeo, ne nos omnia, quæ nolumus,

CONTRA PHILIPPVM.

mus, agere mox necessitas cogat. si enim essent
qui uestra causa labores, & pericula subire uel-
lent; iam pridem extitissent, cum iam pridem ip-
si per uos nihil agatis. uerum, qui hoc uelit, ne-
minem esse, res ipsa indicat. Hæc sunt, quæ qui-
dem ego censeam, atque decernam: quæ si fiât,
in pristinum statum restitui rempub. posse, ad-
huc existimo. sin est, qui melius quid habeat; di-
cat, & consilii causa in medium proferat. quid-
quid autem statueritis, id ut feliciter, prospereq;
eueniat, deos omnes rogo.

K

CONTRA PHILIPPUM

DEMOSTHENIS

Philippica quarta.

AGNA sanè o Athenienses. &
M necessaria ciuitati cum intelligam
esse ea, de quibus deliberatis; co-
nabor, quæ ad communem utilita-
tem pertinere mihi uidentur, his ipsis de rebus
exponere. uerum enim uero, cum uestris neque
paruis erroribus, neque recentibus, sed & ma-
ximis, & ueteribus factum sit, ut in his difficul-
tatibus respublicas uersetur: nihil tamen eius
incommodi culpam æque sustinet, atque hoc,
quod sententiæ cogitationesq; uestræ à rebus
longe distant: & tantisper animum attenditis,
dum hic assidetis, audientes, si quid rerum no-
uarum afferatur: ubi uero ex hoc loco abiistis;
qui curet, curet autem? immo, qui recordetur,
nemo est. petulantia igitur, & auaritia, unde
Philippus omnes homines diuexat, tanta est,
quantam auditis: illum autem concionibus no-
stris minime posse cohiberi, certe, qui igno-
ret; nemo est. etenim, si quis hoc discere ab a-
liis minime potuit, nunc ita consideret. nos, ubi
de iure publico uerba facere oportuit, uicti in

ORA. IIII. CON. PHIL.

disputando nunquam sumus, neque commisi-
mus, quod corrigendum uideretur: sed ipsi om-
nes, qui ubique sunt, uincimus, & orandi laude
præcurrimus. num igitur propterea illius affli-
ctæ fortunæ sunt, nostræ florentes? longe abest.
cum enim ille quidem ueniat armatus: cumq;
omnes suas fortunas in belli discrimen alacri-
ter soleat adducere, nos contra capti ueterno se-
deamus, postea quam & sapiēter disputauimus,
& audiuius quæ digna censuimus: ut opinor,
uerbis facta anteeunt: neque quàm disertis nos
aliquando fuerimus, aut nunc simus in disputā-
do, sed quàm acres in agendo, omnes attendūt.
quo modo quidem nunc agimus, ex iis, quibus
inferūtur iniuriæ, seruare neminem possumus.
nihil enim dicendum est grauius. Proinde, cū
ii, qui in ciuitatibus uiuunt, in duo genera diui-
dantur; alterum eorum, qui neque ipsi per uim
imperare cuiquam, neque seruire uolunt, sed
ita rempub. gerere, ut libertate fruantur, & tan-
tum modo legibus æquo iure seruiant; alterum
autem eorum, qui imperium quidem in ciues
habere concupiscunt, sed ipsi parere alteri non
recusant, per quem modo, ut in ciuitate domi-
nentur, se se posse consequi confidant: accidit,

K ii

III O R A T I O IIII

ut ad eos, qui Philippi partium studiosi sunt, tyrannidis, & dominationis amatores, ubique potentia peruenerit: neque, ut ego arbitror, ex omnibus ciuitatibus, præter uestram, ulla iam reperitur, cuius adhuc penes populum administratio sit. potentiam autem istam, & statum ciuitatis ad ipsorum uoluntatem ita constituerunt, cum nihil, quod in eo genere fieri posset, prætermitterent. quod enim primum omnium, & maximum est, habuere, qui pecunias accipere uolentibus eorum gratia numeraret. deinde, in quo momenti non minus est, ad contrariam factionem euertendam, quandocunque petiere, Philippi exercitus præsto fuit. at uero non modo, quod aliis fuit adiumento, nos deficit; sed ne excitari quidem è somno possumus: ut mandragoræ succum, aut aliud quodpiam eiusmodi pharmacum ebibisse uideamur. hinc, opinor (quid enim uera dissimulentur) ita male audire cœpimus, ita despici, ut ex iis ipsis, qui in discrimine uersantur, alii nobiscum de imperio, alii dignitatis causa de loco contendant, nonnulli etiam suas ipsimet potius iniurias, quam uobis sociis, uindicare decreuerint. sed quorum hæc ego commemoro? non mehercule,

CONTRA PHILIPPVM.

quòd ita sim stultus, ut offensionem uestrà subire cupiam; sed ut hoc unusquisque uestrum intelligat, ac uideat, quotidianam segnitiam, & ignauiam, quemadmodum in priuatis facultatibus, sic etiam in rebus publicis, non, tu quid quid per negligentiam peccatur, illico sensu percipi, sed in summa rerum patefieri. Aspici te Serrium, & Doriscum: hæc enim post pacem primum neglecta sunt à uobis, quæ multi uestrum fortasse ne nouerunt quidem: hæc, inquam, neglecta & Thraciam, & socium uestrū Cersoblepten perdidere. cui malo etiam illud adiunctum fuit, quòd, cum hæc Philippus contempta uideret, neque opem ullam à uobis impetrasse; muros euerit in sinu maris; præsidisq; impositis tyrannidem contra Atticam in Eubœa, tanquam castellū, uobis obiecit. quod ipsum quoque cum negligeretis; parum abfuit, quin Megaram caperet. non curastis: commoti non estis: ne hoc quidem denunciastis, permissuros uos non esse, ut illa committeret. perrexit, & Antronas emit: nec multo post Oreum quoq; in potestatem redegit. etiam multa prætermitto, Pheras, uiam in Ambraciā, trucidationem in Elide, alia sexcenta, non enim, ut

ORATIO IIII.

eos quos Philippus uiolauit, aut læsit, enumerarem, hæc à me suscepta narratio est, sed potius ut hoc ostenderem, Philippum, nisi quis obuiam eat, finem iniuriis non esse facturum, donec omnia omnium ad se se trahat. Neque uero me fugit, quosdam esse, quibus, ante quàm orationes de republica audiant, confestim interrogare mos est, quid igitur oportet agere? non ut, cum audierint, agant (essent enim patriæ rationibus ciues omnium utilissimi) sed ut ab orationibus maturrime se tanquàm ab aliqua molestia expediant. quod cum ita sit, tamen, quod mihi è re uestra uidetur, dicam. Primum id animis uestris persuasum, ac planè certum esse oportet, Philippum neglecta pace bellum cōtra uos gerere; esse non dico male animatum, sed hostem uniuersæ ciuitatis, & ita acerbum quidem hostem, ut uel illius fundamentis, atque adeo diis ipsis, qui illi præsident, minetur: qui quidem ipsum male perdant. nihil autem maiore odio insectatur, quàm libertatem, neque ex omnibus rebus quidquàm cogitat, quàm quo modo hanc dissoluat, ac destruat. atque, ut id ipsum conficiat, impellitur necessitate quadam. sic enim considerate. imperare

CONTRA PHILIPPVM.

uult: in hoc autem solos uos esse nouit aduersarios. iniurias iam pridem infert: idq; sibi ipse conscius est optime: abstulit enim uobis ea loca, quæ quia possidet, reliqua illi extra periculum omnia sunt: si enim Amphipolim, & Potidæam dimitteret, se se ne in Macedonia quidem tuto putaret esse posse. utrunque igitur nouit, & se uobis insidiari, & uos ipsius insidias non ignorare. quia uero probe sapere uos intelligit, infensos sibi iure putat. ad hæc tam multa etiam illud accedit, quod, etsi reliqua omnia imperio suo subiiciat, tamen, quoad uos libertatem retinetis, stabilem sibi possessionem esse non posse perspicue uidet: sed si quando illi minus prospere quid euenerit, qualia euenire homini multa possunt; futurum intelligit, ut ii quibus ipse iniustam seruitutem nuper imposuit ad uos tanquam ad uexillum aliquod libertatis recuperandæ omnes conuolent. est enim naturæ consuetudinisq; uestræ, non uobis ipsis nimiam potentiam appetere: & uelle ad imperium ascendere, sed alios ascendere conantes prohibere, aut si iam ascenderint: deicere: in summa, regnare cupientibus acriter obistere: & omnes homines in libertatem summo

audiri

M O R A T I O R H I I I .

studio uindicare non uult suis consiliis & occasionibus impedimento esse uestram libertatem. neque uero illum ita ratiocinantem res ipsa fallit. quare ita uelim existimetis, animoq; uestro proponatis, ciuitatibus illum, ac populis hostem æternum, & implacabilem esse: deinde, quidquid agit hoc tempore, quidquid parat, id totum ad ciuitatis nostræ perniciem adornari, neque enim uestrum est quisquam, qui ita desipiat, ut Philippum existimet huiusmodi quisquilias in Thracia (quo enim potius nomine appellentur) Drongilum, & Cabylen, & Mastiram, & quæ præterea tenere dicitur, concupiscere, & tantula de causa labores, hyemem, extrema pericula subire, atque perferre; porius aut, qui in Attica sunt, naualia, triremes, argentum factum, hæc tam copiosa uestigalia, hanc regionem, hanc gloriam, quibus utinam neque illi, neque cuiquam nobis uictis frui liceat, minime concupiscere; sed hæc uobis fruenda relicturum; interea panici, & filiginis causa, quæ in Thaciæ cuniculis nascuntur, in ipso planè barathro hyemem traducere. non ita est: sed & illa, & reliqua omnia propterea fiunt, ut hæc, quæ nos habemus, ipse habeat. quæ cum omnibus

CONTRA PHILIPPVM.

nibus perspicua, explorataq; sint, nihil est, quod
oratore, optime semper de repub. consulen-
tem, de inferendo bello statuere iubeatis. hoc
enim est eorum, quibus id propositum est, ut
habeatis cui tanquam hosti, molestias damnaq;
inferatis, non ut ipsi, quæ ciuitati conducunt, a-
gentes bonorum ciuium officio fungantur. at-
tendite enim: Philippo semel, iterum, & ter-
tio fœdus uiolante (sæpe enim deinceps idem
fecit) si quis de ipso uindicando retulisset; at-
que is nihilominus Cardianis opem tulisset, si-
cuti nunc fecit, nemine uestrum de bello refe-
rente: non, qui illum hostem iudicandum cen-
sisset, discerptus esset; atque hanc ipsam ob
causam Philippum Cardianis opem tulisse om-
nes uociferarentur? nolite igitur quærere, quem
nam ob iniurias à Philippo acceptas odio ha-
beatis, & iis, qui suam illi operam uendide-
runt, dilaniandam rempub. obiiciatis: neque
cum ipsi bellum iam decreueritis, inter uos ip-
sos disceptetis, utrum decreuisse oporteat, nec
ne: sed qualem illum gerendis rebus cognoui-
stis, tales uos in ipso ulciscendo præstare. pri-
mum iis, quos habet aduersarios, pecunias, &
necessaria quæque suppeditate: deinde ipsi ipsi

L

IN MORATIO III.

O Athenienses collatis pecuniis: exercitum, ce-
 leres triremes, equitatum, naues conductitias,
 & quaecunque bellum postulat, comparate. quo
 modo quidem nunc agimus, ridiculi sumus.
 neque uero aliud Philippum ipsum à diis preca-
 ri puto, quam ut hæc, quæ facitis, eadem perpe-
 tuo faciatis. opportune nihil agitis: pecunias
 inconsulte disperditis: cui res militaris com-
 mittenda sit, quæritis: stomachamini: inui-
 cem accusatis. horum ego malorum & causas,
 & remedia docebo. Nihil unquam à princi-
 pio instituitis, aut mature satis apparastis: sed
 post casum semper accurritis. deinde, ubi in-
 tempestiuam, atque inanem esse operam intelli-
 tis, apparatus infecto negotio dissoluitis, rur-
 sus, si quid contingat, apparatus instauratis, &
 tumultuamini. mihi quidem ista consuetudo
 non probatur: quid enim? tum demum auxi-
 lium ferre, cum in discrimen adducta res est?
 nihil hæc ratio proficit. sed & parare copias an-
 te oportet, & his com meatum curare, & ut pe-
 cuniæ diligentissime conseruentur, dispensatio-
 ni certos homines præficere: ubi hæc ita con-
 stituta fuerint: pecuniæ rationem à dispensato-
 ribus, belli uero à duce reposcere, eiq; si quo

CONTRA PHILIPPVM.

præter mandata uestra nauigauerit, aut aliud
quid egerit, locum excusandi nullum relinque-
re. hæc si feceritis; meumq; consilium proba-
ueritis; necessitatem imponetis Philippo, ut re-
uera pacem optimo iure seruet, & in sua se regio-
ne contineat, aut, si temperare ab iniuria nolue-
rit, bellum æqua conditione geretis. & forsan
foran o Athenienses, quemadmodum nunc
uos, quid agit, aut quò proficiscitur Philip-
pus, interrogatis, item ille, quò nam se contu-
lit uester exercitus, & ubi sese ostendet, sollicito
animo cogitabit. quòd si quis hæc & multæ im-
pensæ, & multorum laborum, multaq; opera
putat esse; recte sanè putat: uerum, si, quæ ci-
uitati mox euentura sint, nisi hæc facere uolue-
rit, idem considerabit, cuius emolumenti sit,
intelliget, ea, quæ res postulat, sponte, ac liben-
ter facere. nam, si quis nobis deus hoc spon-
deat (neque enim cui fides in eiusmodi re ha-
beatur, satis dignus homo quisquam sit) Phi-
lippum, si quieueritis, & quos oppugnat, nulla
ope iuueritis, contra uos ipsos ad extremum
non esse uenturum, turpe mehercule & uobis,
ac præsentis ciuitatis nostræ dignitate, & auita
gloria sit indignum, propriæ desidiæ causa com-

L ii

IN V O R A T I O I I I I .

mittere, ut cæteri Græci in seruitutem omnes tradantur: & ego ipse mori sanè, quam hæc tam pudenda suasisse, maluerim. at uero, si quis alius suadet, & ita quidem, ut etiam persuadeat; esto: ne uindicate iniurias: uniuersam Græciã perdit. Sin hoc nemini probatur; contraq; quò plus illum potentia quærere permittimus, eò difficiliorem, ac ualentiorē nobis hostem fore prospicimus, quid tergiuersamur? aut quid immoramur? aut quando tandem Athenienses præclare, & laudabiliter agere animum inducemus? an, cum necessitas coget? prò dii immortales, quæ necessitas? quam enim liberorum hominum necessitatem aliquis dixerit, ea non solum iam adest, sed etiam multo ante præterit, quam uero seruorum, execrari istam, nō, ut adsit, expectare debemus. differt autem hoc inter utranque, quòd homini libero maxima necessitas est dedecus, & infamia; atque haud scio, an ulla maior esse possit: seruo autem plagæ, corporisq; percussio, quæ ne unquam subeatur ignominia, ne monere quidem honestum est. at uero, quòd ita affecti animo estis, ut ab iis muneribus, quæ uestrum unusquisque & corpore, & facultatibus obire pro repu. debet, om

ii J

CONTRA PHILIPPVM.

nes refugiat; minime id quidem rectum est, minime inquam: at aliqua tamen excusatione non caret; quòd autem neque ea, quæ audire oportet, neque ea, quæ deliberanda sunt, ne hæc quidem ipsa uultis attendere; hoc uero ita graue est, ut excusationi locum planè nullum relinquat. uos igitur, priusquam præsentis discrimine, sicuti nunc, ciuitas urgeatur; neque oratoribus de communi re dicentibus aures dare, neque in quiete, dum licet, quidquam deliberare consueistis: ubi uero ille molitur aliquid contra uos; cum idem facere, & contra moliri deberetis, inertia dediti nihil agitis: quòd, si quid aliquis eloquatur, eiectus optimi consilii poenas dat: at, cum uel periisse aliquid, uel in discrimine uersari, nunciatum est; tunc demùm & auditis oratores, & apparatibus operam datis. erat autem eo tempore & audiendi occasio, & deliberandi, cum utrumque neglexistis; nunc non audire, quæ agatis, uos oportuit, sed ea, quorum causa nunc auditis, agere; neque in apparatu esse, sed apparatis iam rebus uti. Ita que uos ex istiusmodi consuetudine soli omnium hominum contra, quàm ceteri solent, facitis, ceteri enim homines ante rem delibera-

M O R A T I O III.

re omnes consueuerunt; uos tum demum deli-
beratis, cum transacta iam re superuacaneum
est. nunc, quod superest, quod antea quidem
factum oportuit, sed fieri tamen adhuc satis
mature potest, id exponam. Ex omnibus re-
bus nullam magis respubl. his tam periculosis
temporibus desiderat, quam pecunias, porro cō-
moda quædam ultro fortuna detulit; quibus si
recte utamur, optime, ut arbitror, consulatur.
Primum, quorum fidei Persarum rex multum
committit, quosq; bene de se meritos duxit, hi
Philippum odere, & cum eo bellum gerunt. de
inde, qui actiones omnes, & consilia de regis
perniciæ cum Philippo communicabat, hic ab
rogato imperio reuocatus ē prouincia est: & om-
nia rex, non nobis deferentibus, quos proprii
commodi causa commotos interpretari potuif-
set, sed illo ipso, qui & egit, & administrauit,
narrante cognoscet; ut ex hoc & fidei plus apud
illum habitura sit accusatio, & reliqua mox le-
gati uestri subiicere possint: quæ rex libentis-
sime audiet; quod communes iniurias com-
muni bello uindicari dignum sit: atque etiam
ob illam causam, quod ei longe formidabi-
lior erit Philippus, si prius impetum in nos

CONTRA PHILIPPVM.

fecerit: quibus destitutis si aduersi quid euenerit, liberius in illum irruet. quæ cum ita sint, faciendum censeo uobis esse, ut legationem, quæ Regem alloquatur, & edoceat, mittatis, atque ut rationem istam, quæ uobis sæpe damno fuit, inanem sanè, ac stultam, abiiciatis; quod barbarus est, quod communis omnium hostis, quæq; huius generis alia sunt. ego enim, cum aliquem uideo, qui regnantem in Susis usque, & Ecbatanis metuatur, eumq; male animatum erga nostram ciuitatem dicat esse, qui & afflictas antea reip. fortunas erexerit, & nunc idem polliceatur (quod beneficium cum uos accipere nolueritis, sed decreto facto reieceritis, uestra sanè, non illius est culpa) cum igitur ita sentientem aliquem uideo, eundemq; de Philippo securum intueor, Philippo inquam, qui nobis ad portas obequitat, qui in media Græcia uolentus latro Græcorum rapinis crescit, sanè obstupesco; & hunc, quicumque tandem est, qui ita sentiat, ego quidem timeo, quandoquidem ipse Philippum timere non uult. Est autem o Athenienses & aliud quoddam in ciuitate, tanquam ulcus nostræ salutis periculosum, de quo iniusta maledicta, & sermones minime rectos

ORATIO III.

exaudio; quo quidem ii, qui nullam reip. partem uolunt suscipere, ad ipsorum excusationē abutuntur: & eorum, quæ in eo genere peccantur, cum hæc referri ad aliquid oporteat, omnē huic conferri causam reperietis. de quo magno pere equidem uereor dicere, sed dicam tamen, puto enim me & pro egentibus aduersus abundantes, & rursus pro his aduersus illos ea dicturum, quæ cum ratione consentiant, quæq; utilitas reip. postulare uideatur: si querelas, quas nō nulli de ærario disseminant, iniuria sanē, de medio tollamus: & simul eum timorem amoueamus, corrigi hoc sine aliquo insigni malo minime posse: quo quidem remedio salutaris nihil in remp. possumus inducere, neque quod uniuersam pariter ciuitatem recreare magis possit. sic enim considerate; dicam autem pro iis ante, quibus angusta res uidetur esse. Nostra memoria Athenis publica pecunia non progrediebatur ultra triginta talenta supra centum: neq; tamē ex iis, qui classibus præesse, aut ex iis qui ad eam rem tributa conferre poterant, inuentus est quisquam, qui, quod nummaria facultas non admodum esset ampla, propterea non id sponte obiret, quod è repub. uideretur: sed & classes
naui-

CONTRA PHILIPPVM.

nauigabant, & pecuniæ conficiebantur, & omnino omnia, quæ reip. conducerent, præstabamus. ipsa deinde fortuna, benigne nobiscum agens publica uestigalia multiplicauit, & quadringena talenta pro centenis facta sunt, idque non modo sine damno, uerum etiam cum beneficio locupletum. diuites enim omnes, ut aliquam inde capiant utilitatem, accedunt, & recte sanè faciunt. quid igitur sustinuimus iniuriæ, ut hoc inuicem conuittantes exprobremus? aut cur nostram tueri desidiam hac excusatione conamur? nisi si ita sumus iniqui, ut pauperibus ob eam causam inuideamus, quod subsidium illis aliquod fortuna detulerit: quos quidem ego neque accuso, neque accusatione dignos puto. nam neque in priuatis ædibus adulescentem quenquam erga senes ita animatum intueor, neque ita parum de officio suo laborantem, aut ita ab ratione auersum, ut, nisi omnes eadem, quæ ipse, omnia faciant, se quoque nihil facturum esse dicat. si quis enim sit eiusmodi, hunc malæ actionis crimine reum leges faciunt. genitoribus enim, ut ego sentio, duplici nomine debitam gratiam & iure naturæ, & præscripto legis, iuste perfoluere, ac libenti nos

M

M O R A T I O H I I I .

animo reddere æquum est. quemadmodum igitur uniuscuiusque nostrum pater aliquis est, sic & uniuerſæ ciuitatis parentes æq; omnes ciues conuenit existimari. neq; solum id spectare nõ debemus, quo modo ex iis commodis, quæ capiunt è repu. ullum amittant, sed, si hæc ipsa omnino nulla forent, rationem iniri à nobis oporteret, ut esset, unde illorum indigentia subueniretur. quod si diuites in hac sententia sunt, eos ego non solum iuste, sed utiliter etiã facere existimo. ubi enim facultates aliquibus adimuntur, ibi ut multi sint male in rempublicam animati, necesse est. pauperibus autem hoc consilii dederim, ut id, quo diuites indignantur, quodque iure accusant, longe à sese amoueant. agã enim, ut modo tenuiorum, ita nunc diuitum quoque causam: neque committam, ut ad patefaciendam ueritatem segnior uideri possim. mihi enim nemo non dico Atheniensium, sed omnino omnium hominum ita infelix, aut ita crudelis uidetur esse, ut cum pauperes, atque in summa penuria constitutos necessaria de publico uideat accipere, moleste ferat. ubi igitur res tota uersatur, aut quæ nam diuitibus est quotidiani sermonis, & indignationis causa? cum

CONTRA PHILIPPVM.

nonnullos uident mutata consuetudine à pū-
blico lucro ad priuatorum facultates conuerti;
& qui hæc suadeat, confestim apud uos ma-
gnū esse, & accepta fide publica immortalem.
quò sit, ut clandestina consilia in apertum tumul-
tum erumpant. hinc diffidentia, hinc oritur indi-
gnatio, oportet enim utrosq; reip. participes æ-
que esse: diuites, ut ea, quæ habent, tuto se habe-
ad uitam traducendam existiment, neque inde
periculi sibi quidquam procreari; atque ut bel-
li temporibus communiter ad patriæ salutem
fortunas omnes conferant: reliquos autem, ut
quæ publica sunt, publica, & communia pu-
tent; partemq; ex iis capiant; quæ uero priuata,
possessorum propria ducāt. hac æquitate & par-
uæ ciuitates, magnæ fiunt, & magnæ conseruan-
tur. uerum, quæ utrosque decent, hæc, aliquis
dixerit, fortasse sunt? ut autem recte quoque, ac
legitime fiant, correctione opus est. Mihi sanè
in hunc temporum statum, atque in has pertur-
bationes intuenti, ita uidetur, tanta mala non
ex paucis, & recentibus, sed ex multis, & uete-
ribus causis excitata: quas, si audire uobis pla-
cet, commemorabo. Præclaram consuetudi-
nem ò Athenienses à maioribus traditam ne-

glexistis; qui excellere inter Græcos, & instructo exercitu ab omnibus iniuriam propulsare, superuacaneum quiddam, ac planè inutilem sumptum esse ducitis, persuasi scilicet ab iis, qui remp. administrant: at inertio otio uitam traducere, & laudabiliter nihil agere, uerum singula quæque proiicere, & pati ab altero occupari, illud uero mirabilem felicitatem, ac maximum communi salutis præsidium existimatis. Enimuero his de causis in locum à uobis desertum succedens alter, locum inquam, quem tenere nos decuit; hic nimirum felix, hic magnus, hic multorum locorum dominus factus est: iure sanè. quod enim erat honorificum, & eximium, atque præclarum, usque eò, ut propter id ipsum maximæ ciuitates perpetua inter se contentione certarint, id ille cum Lacedæmonii iam defloruissent, Thebani Phocensium bello distinerentur, nos otiosi negligeremus, per aliorum absentiam occupauit, ac cepit: itaque mox ad alios timor, ad ipsum sociorum multitudo, & magna potentia peruenit: eoq; iam difficultatis redactæ sunt Græciæ fortunæ, ut, quid capiendum consilii sit, non facile reperiatur. sed cum omnes Græcos, ut ego quidem iudi-

CONTRA PHILIPPVM.

co, maximus hoc tempore circumstet metus, uobis tamen ò Athenienses præcipuum impendere periculum uidetur, non solum, quia uobis præter cæteros insidiatur Philippus; sed etiam, quia ipsi præter cæteros estis inertissimi. nam, si, quòd rerum uenalium multitudinem, & copiã in foro cernatis, propterea securo animo estis, tanquam ciuitas omnino sine periculo sit; neque prudenter, neque recte dere iudicatis. si quidem ex huiusmodi rebus optime sanè de foro ipso, ac mercatu in utranque partem iudicari potest: at uero de ea ciuitate, quam sibi, qui cunque Græcis imperare unquam uelit, unam aduersariam fore putat, communiq; libertati præsidio futuram, haud hercle ex rebus uenalibus, num ea recte se habeat, iudicandum est, sed partim ex beneuolentia sociorum, partim ex robore copiarum: hæc, hæc sunt potius de ciuitate consideranda: quæ uobis infirma sunt omnia. quod ita esse intelligetis, si sic considerabitis: Ecquando perturbatior unquam fuit, magis ue de sua salute Græcia uenit in dubium? certe non unquam magis, quàm hoc tempore. nam antea quidem, cum in duas diuisa factiones esset, Lacedæmonios, & nos: cæteri Græci

M V O R A T I O IIII.

partim nobis, partim illis parebant; Persarum regis æque suspecta omnibus fides erat: & si quibus bello deuictis mitis erat; suamq; fidem, ac tutelam pollicebatur, iis quidem tandiu probabatur, dum aliis exæquaret; deinde uero non minus oderant ipsum, quos seruarat, quam qui cum eo bellum continenter gerebant, at nunc Græcis omnibus amicissimus Rex est, nobis autem minime omnium; nisi si quid nunc eiusmodi agemus, ut digni eius amicitia uideamur. iā præfecturæ multæ, & ubique constituuntur: & de principatu quidem omnes contendunt; quidam autem ab aliis defecerunt, & inuident, & contra quam oportebat, mutuo diffidunt, & relictī singuli soli sunt, Argiui, Thebani, Corinthii, Lacedæmonii, Arcades, nos. ueruntamen cum in has partes, atque in has factiones diuisa Græcia sit (ut id, quod res est, libere dicam) apud horum quemlibet frequentiores de communi salute consulturi, quam apud uos, uisuntur: nec mirum: uos enim nemo diligit, uobis nemo credit, uos etiam nemo metuit: merito igitur uobiscum nemo de publica re communicat. atque horum malorum ne putetis Athenienses unam esse causam (nam si ita esset, facile

CONTRA PHILIPPVM.

sanari ciuitas posset) sed & multa sunt, & uaria,
& omnium temporum peccata: quæ singula nō
persequar; unum, quò diriguntur omnia, uo-
bis exponam, cum tamen id prius petiero, ne
quid mihi, si, quæ uera sunt, libere dicam, ira-
scamini. Quid quid utile uobis unquam
fuit, id, ut quæque detulit occasio, diuendi-
tum est, ita factum, ut uos quidem ignauum
otium, atque inutilem quietem malueritis, qui-
bus deliniti, lædentibus rempub. ne succensetis
quidem: alii uero amplissimis honoribus potiū-
tur. & in hoc genere, quæ reliqua sunt, per-
quirere non decet. ubi uero contigit, ut contra
Philippum aliquid dicatur; illico exurgit ali-
quis, qui nugas audiendas esse neget, & à susci-
piendo bello deterreat; ac deinceps illud etiam
adiiciat, iucundissimum esse, in pace uiuere; cō-
tra difficillimum, maximos exercitus alere, uel
le nonnullos publicas pecunias interuvertere, &
alia in hanc sententiam, prout ipsi ueriora putāt
esse. at certe suadere uobis pacem, qui iam per-
suasi desideris, non oportet. illi, illi suadenda
pax est, qui bellum contra uos gerit. qui si per-
suasus fuerit, sanè, quod ad uos attinet, pacata
erunt omnia. neq; uero molesta nobis, aut gra-

and

.M VORATI I O I I I I .

uia uideri debent, quæ in nostram salutem insumimus, sed ea, quæ, si hæc recusamus, sustinebimus. & quidem, ut ne pecuniæ diripiantur, caueri oportet; inuenta ratione, qua conseruentur; non omittenda reipublice cura, ego sanè & hoc ipsum inique patior, nonnullos è uobis esse, quibus diripi quidem pecunias molestum est, quas conseruare, & in direptores animaduertere uobis licet; Graciam autem uniuersam deinceps à Philippo diripi molestum non est, præsertim, cum ille ad perniciem uestram diripiat. quid igitur causæ tandem est o Athenienses, cur eum, qui tam aperte iniurias infert, & ciuitates occupat, nemo unquam neque iniurias inferre, neque bellum dixit facere: eos autem, qui, ne Philippo credamus, neue rempublicam proiciamus, admonent, bellum facere disseminant; quod ea, quæ præter animi sententiam in bello eueniunt (necesse enim, necesse omnino est, acerba ex bello multa contingere) iis, qui pro uestra salute concionari consueuerunt, ascribi omnes uolunt. intelligunt enim, si uos de communi sententia bellum Philippo unanimes inferatis, futurum, ut & ille superetur, & ipsis proditoris merces nulla relinquatur. sin ex primis illis tumultibus

bus

CONTRA PHILIPPVM.

bus ad aliquos accusandos, & iudicandos conuerſi fueritis; ſe quidem iſti duplicem mercedem ſperant habituros, gloriam apud uos, pecuniam à Philippo: uos autem, quibus de rebus pœnam ab iſtis capere oporteret, capturos ab iis putant, qui pro ueſtris cōmodis uerba fecerunt. hæc uidelicet ſpes illis eſt, hoc ſpectant, cū à bonis uiris bellū ſuſcitari dicunt. at ego illud probe noui Philippū, priuſquā Athenis quiſquam de bello uerbum fecit, & alia nobis multa eripuiſſe, & nunc in Cardiam auxiliares copias miſiſſe. itaq; ſi negare iſti uolumus bellum ab illo contra nos geri, ſit ſanè omnium ſtultiſſimus, ſi quod nos negamus, ipſe fateatur. cum enim ii, quibus inferuntur iniuriæ, diſſimulant; eum, qui infert, quid facere par eſt? at cum idē in nos ipſos irruet, quid tum dicemus? nam ipſe quidem bellum ſe nobis inferre negabit, quē admodum & Oritis, cum iam in eorum regione milites eſſent: & antea Pheræis, priuſquā ad muros machinas appelleret, & Olynthiis, donec regionem eorum cū exercitu eſt ingreſſus. an tum quoq; eos, qui ad ulciſcēdas iniurias hortabuntur, belli auctores dicemus eſſe? Hem, in ſeruitutem miſeri trudemur: aliud enim ſupe-

N

rerit nihil. Nec uero uobis idem, quod cæteris hominibus, periculum impendet, non enim ciuitatem nostrā imperio suo subiicere uult Philippus; non hoc inquam uult ò Athenienses, sed eruere penitus, atque excindere: nec mirū, quandoquidem optime nouit, neq; seruire uos uelle, neque, si uelitis, diu in ea conditione uicturos: imperare enim consueuistis. intelligit autem, plus sibi à uobis, si oblatam occasionem amplecti uolueritis, futurum negotii, quàm à cæteris hominibus: propterea, si compos uoti factus erit, uobis minime parcat. tanquam igitur de salute ipsa, ac planè de laribus, & focis extremum uobis certamē futurum sit, ita de re de liberare, & eos, qui pro illo fecerunt, aperte odisse, atque adeo suppliciis afficere opus est. hostes non extra urbem modo, sed in ipsa, in ipsa etiam urbe hostes habetis. hos punite prius, si illos cupitis deuincere: nam hi uestras in actiones incurrunt, quasi propugnacula quadam, quò minus mature illis possitis occurrere. enim uero, quid causæ putatis esse, cur ille nunc ita contumeliosus in uos sit (planè enim hoc agere mihi uidetur (ut, cum alios datis beneficiis, si aliter non potest, in fraudem illiciat, uobis aper

CONTRA PHILIPPVM.

te iam minitetur? Theſſali nunc ſeruiunt: at
hos artiſcioſa liberalitate in ſeruitutem induxit:
quid non cōceſſit miſeris Olynthiis? Potidæā,
& alia multa, ut eos illaquearet. nunc Theba-
nis eadem molitur: itaq; & Bœotiam tradidit;
& diuturno eos, ac difficili Phocenſi bello libe-
rauit. at hi quidem, quos commemorauī, cum
aliquem fructum ſinguli præcepiſſent, ad extre-
mum alii ea, quæ omnes nouerunt, paſſi iam
ſunt, alii, quæcunque Philippi libido feret, pa-
tientur. uos autem, quæ amiſeritis, prætereo:
ſed ſub ipſam ſtatim pacem quàm turpiter dece-
pti? quantis detrimentis, qua iactura? nō Pho-
cenſes, non Pylas, non in Thracia Dorifcum,
Serrium, Regem ipſum Cerſoblepten, non Car-
diam deniq; nunc habet, & fatetur? cur igitur a-
ſtute, & blande cum aliis agit, uobiſcum nō itē?
quod in aliis ciuitatibus homines mercenarii
orationem pro hoſtibus habere impune nō poſ-
ſunt, at in ueſtra, etiam poſt detrimenta uobis
illata, maxime poſſunt. tutum non erat in O-
lyntho pro Philippo dicere, antea quàm accepta
Potidæa Olynthiorum multitudo propter utili-
tatem delinita conſenſit. tutum non erat in
Theſſalia pro Philippo dicere, antea quàm ty-

M O R A T I O R H I I I O

rannos eiiciente Philippo, & Pylæam restituen-
te, plebs Theſſalorum beneficio, ac munere
commota, à priſtina conſuetudine deſciuit. tu-
tum non erat Thebis, priuſquàm & Bœotiam
reddidit & Phocenſes euerit. at uero Athenis,
cum non Amphipolim modo, & Cardianorum
regionem eripuerit Philippus, ſed Eubœam e-
tiam, tanquam caſtellum quoddam aduerſum
nos paret, & nunc Byzantium proficiſcatur, ta-
men pro Philippo dicere tutum eſt. tutum au-
tem? immo uero horum nonnulli, qui illius cau-
ſam tuentur, repente ex egentibus diuites, ex ob-
ſcuris, atque ingloriis, illuſtres, & glorioſi facti
ſunt, uos contra è glorioſis inglorii, ex locuple-
tibus inopes: ſiquidem ego ciuitatis diuitias iu-
dico, ſocios, fidem, beneuolentiam, quorum
omnium inopia uobis eſt maxima. Hæc quia
minime attenditis, & quotidie magis ruere om-
nia ſinitis, propterea ille felix, & magnus, & om-
nibus Græcis, ac barbaris formidabilis eſt, uos
deſerti, atque abiecti. ſi rerum uenalium copiã
in foro ſpectes, præclari quidem, atq; omnium
celeberrimi, ſin earum rerum, quæ neceſſariæ
ſunt, apparatus cõſideres, perridiculi, omniũq;
poſtremi, ac mihi quidem nonnulli ex iis, qui



CONTRA PHILIPPVM.

concionantur, haud sanè de uobis, & de ipsis eodem modo consulere uidentur. nam uos quiescere dicunt oportere, etiam si uobis iniuriam aliquis inferat: ipsi uero apud uos quiescere minime possunt, cum ipsis iniuriam inferat nemo. At si quis extra conuitium sic interroget, Dic Aristodeme, cum tu hæc probe noris (nemo enim hæc ignorat) esse hominum priuatorum tutam, & otiosam, & expertem periculorum uitam, eorum autem, qui rempublicam administrant, contentiosam, & dubiam, & quotidianis certaminibus, incommodisq; refertam, cum hæc, inquam, noris, cur non tibi quietam & inertem, sed periculosam elegeris? quid huic responderis? nam si illud, quo nihil melius est in tua causa, tibi concesserim uere dici, hæc te pro dignitate, & gloria cuncta facere: ualde miror, cum ipse tibi omnia gloriæ causa esse facienda, cum suscipiendos labores, adeunda pericula statuas, quamobrem patriæ tuæ auctor sis, ut istam ipsam gloriam, quam tu tibi summis laboribus, & periculis colligere uis, ipsa iam antea collectam, nunc per ignauiam effundat. nisi si illud dixeris, tibi quidem inter tuos ciues summam quandam dignitatem esse oportere, ciui-

INVOCATIO III.

bus autem ipsis inter Græcos nullam oportere,
atqui nec illud uideo ciuitati, si suas tantummo-
do res agat, tutum esse; tibi autem, si præter tua
priuata negotia nihil cures, periculosum. po-
tius contra fit. nam & tibi, cum ita laboras, at-
que elaboras, & ciuitati, cum quiescit, ac cessat
pericula creantur maxima. at præclarus auus,
illustris pater tibi fuit, quorum uirtutibus non
respondere turpe ducis; ciuitati autem ignobi-
les maiores, aut eiusmodi, ut ad laudem recte fa-
ctis excitare non possint. ne hoc quidem ita est.
nam tibi fur pater erat, id est tui sanè similis; ci-
uitati uero nostræ non patri tuo similes maio-
res, sed ii, qui, ut omnes nouere, Græciam bis
ex maximis periculis ereptam cōseruarunt. sed
enim haud similiter, neque ex iure ciuium &
priuatam rem suam, & publicam quidam admi-
nistrant, quid enim minus simile, quàm horum
nonnullos, nuper è carcere dimissos eò ampli-
tudinis peruenisse, ut ipsi se ipsos uideātur igno-
rare: ciuitatem autem, quæ reliquis Græcis di-
gnitate antea præstitit, summumq; locum tenuit
nunc ad omnem ignominiam, humilitatēq; de-
mitti? multa præterea posse, ac de multis dicere:
sed omittā; quandoquidē nō orationū penuria

CONTRA PHILIPPVM.

mihi uidetur neque nunc, neque unquam ante male affecta resp. laborasse, sed tum potius, cum uos, postea quam ab oratoribus salutaria uobis remedia didicistis, & una uoce, ac mente, ut recte dicitur, comprobastis, iidem tamen eos quoque, qui hæc ipsa deprauare cupiunt, atque inuertere, pariter audituri sedetis; nō quod eos ignoretis (statim enim intellexistis, perspicueq; uidistis, quis mercenariam habeat orationem, quis Philippi causam in repu. curet, quis re uera libertatem tueatur) sed ut, ad hos accusandos occasionem capientes, et deinde ad risum, cōuitiumq; deflectentes, remedia interim illa recreandæ ciuitati necessaria prætermittatis. Dixi quæ uera, & utilia uobis maxime sum arbitratus quiq; meus in uos amor est libere admodū, simpliciterq; dixi. non assentatione, non fraude, nō insidiis referta oratio est, quæ pecuniam quidē oranti conciliet, rep. autem hostibus dedat: aut igitur hæc dimittenda cōsuetudo uobis est, aut, quod omnia male succedant, nemini istam infelicitatē, præterquam uobis ipsis adscribite.



005262563

CONTRA PHILIPPUM

mih iudicet neque nunc neque undam an-
tes male affecta respiciat, sed uti potius ip-
sum nos potius quam ad orationis salutem
nobis remedia deditis, & nos uocet, ac moneat
ut, ut recte dicunt, compropaliamus, item tamē
eos quodque quicquid debeat, cupimus ac
que inuicem, pariter audire, sed etiam quod
eos ignotus (nam enim intellexit, per ip-
sum, quia, quis mercenariam habet oratio-
nem, quis Philippi canem in rebus curat, quis
re ut libere inuenit) sed ut ad hoc accedant
dos et aliam cupientes et deinde de illis, cum
minimū delectat, remedia interim illa res
creant et cetera necessaria pretermittunt. Dixi
autem, & nulla nobis maxime sum arbitrus
quod, meus in nos amor est libere admodum, si-
pliciter dixi, non altercatione, non stultis
indignis oratio est, que pecuniam quidem
oratio conciliat, tempus autem hostibus debeat
aut igitur hanc humiliter cōsultando nobis est, ut
aut quod omnia male succedant, nemini istam
infelicitate, preterquam nobis ipsi adscribat.



